



Isipla wei long promotim bisnis bilong yu

GUTPELA KWALITI, GUTPELA PRAIS LONG PNG


Bisnis Kads

K120 | K175

200 kads + takis
Printin tasol

200 kads + takis
wantaim disain wok

Wanpla sait, ful kala 300 gsm pepa.



INSAIT:



Is Nu Briten guria, ...no gat bagarap

WANPELA tok save i bin kam long opis bilong Jiofisikel Obsevetori long Pot Mosbi olsem, Is Nu Briten i bin pilim wanpela bikpela graun guria i kamap long Tunde dispela wik.

Ol masin bilong obsevetori i bin soim olsem dispela guria em em i kamap stret long 11:44 long moning taim na mak bilong em i stap long 5.6 digri Saut, 152.1 digri Is long klostu long Pomio. Dispela guria i kamap insait long graun em i 60 kilomita i go daun na i stap long mak bilong 7.2 long rikta skel. Dispela em i klostu tumas na mekim graun i seksek bikpela tumas.

Long Rabaul na Kokopo na ol ples klostu ol pipel i bin pilim strongpela graun i guria na i gat toktok olsem sampela bagarap i bin kamap. Ol i tok pret olsem no gut bai gat wanpela sunami tu i kamap olsem na toksave i go raun long olgeta ples long nambis bilong ol Niugini Ailan, Papua Peninsula na Milen Be.

Jiofisikel Obsevetori i tok ol i mak bilong bikpela solwara inap go long



Mep bilong tektonik plet i bungim PNG wantaim Nepal long kamapim dispela guria.

mak bilong 0.3 i go 1 mita mak. Sampela lain husat i stap long Rabaul taun i tok olsem ol i pilim Guria tasol i no gat senis long solwara. Tasol long Kokopo em solwara i bruk go antap long nupela maket.

I gat nius ripot i kamap long dis-

pela guria olsem i bin gat wanpela guria i kamap pastaim long Fonde long mak bilong 6.7 long nait na bihain narapela gen long mak bilong 6.8 long Fraide nait.

Nau dispela strongpela guria long Tunde i bin kamap long de

taim na i bin mekim planti ol skul pikinini na ol tisa wantaim ol pipel i stap long Kokopo na Rabaul taun na long ol ples klostu i ranawe i go ausait long ol haus taim ol i pilim strongpela guira.

Planti ol skul, stua na ol opis i bin pas na ol papa na mama i go kisim ol pikinini long ol skul.

Long wankain wanpela nius i kam long ABC i bin tok olsem ol bikpela ston aninit long graun ol i kolim long 'tektonik Plet' i surik na kamapim guria long PNG.

Mathew Moihoi, Seismologist o saveman bilong ol guria na maunten paia, long dipatman bilong mineral polisi na jiohasat long Pot Mosbi i bin tokim Caroline Tiriman bilong ABC radio, olsem ol plet aninit tru long ol solwara na graun i save surik na bamim wanpela narapela, na i kamapim ol bikpela guria olsem long PNG na Nepal. Tasol em i tok, maunten paia long Is Nu Briten bai no inap pairap bihainim ol guria.

Mista Moihoi i tok ol tektonik plet aninit tru long solwara na insait tru

long graun i save surik i go i kam na i kamapim guria, wankain olsem guria em i bin kamap long Nepal long wik i go pinis.

Moa long 7 tausen pipel i bin dai long dispela guria long Nepal na bikpela bagarap tru i kamap long ol haus, rot na ol narapela infra-straksa.

Nepal em i wanpela kantri em i stap antap tru long ol bikpela maunten long Esia, klostu long Maunten Everest, wanpela bikpela maunten tru i winim olgeta maunten long wol.

Mista Moihoi i tok olsem planti pipel i dai long Nepal long wanem ol haus i bin bruk na pundaun antap long ol na i kilim ol.

Nau yet long PNG i no gat ripot bilong ol bikpela bagarap i kamap bihainim dispela ol guria long Is Nu Briten tasol, ol atoriti i salim tok lukaut i go long olgeta lain i stap long ol nambis bilong Niugini Ailan provins na long Milen Be long was gut, no gut bai gat sunami tok lukaut i kamap.



SP HUNTERS
now on **tvwan**

PURCHASE A DIGICEL PLAY BOX TODAY K185 AND GET FRONT ROW SEATS TO ALL THE ACTION!

WWW.TVWAN.COM.PG

available on
Digicel play

Minista stori long edukesen na helt long APEC deligesen

Stanley Nondol i raitim

LONG aste moning toktok bilong Minista bilong Nesenel Plening, Charles Abel i no redi long taim long presenim long bikpela deligesen bilong APEC long Pot Mosbi.

Ol bikpela lida bilong APEC kantri i bung long Pot Mosbi long dispela wik long toktok long bikpela level bilong humen kepesiti biling. Na taim Minista bilong Nesenel Plening i go antap long fran em i tok sori long ol deligesen olsem toktok bilong em i no redi yet na ol i wet long sampela minit.

Minista Abel i tok man i holim pepa i stap ausait bikos sekuriti em i strong tru.

OIAPEC kantri bung em, indonesia, PNG, Japan, Philippines, Australia, Nu Silan, China, Chile, na ol arapela

kantri long Esia na Pasifik. Dispela em namba wan bikpela bung PNG i holim long Mosbi.

Mista Abel i makim Prais Minista O'Neill long namba wan de bilong miting long aste. Bihain long sampela minit ol wokman i kisim toktok bilong Minista i kam na Minista Abel i ritim namel long 3 na 5 minit na pinisim wantaim tok "tenkyu"

Long ol toktok Mista Abel i ritim i toktok moa long ol helt, edukesen, lo na oda na ol infrastraksa projek gavman bilong PNG i wok long mekim long kantri.

Minista Abel i tok lukluk bilong PNG gavman em long 4-pela bikpela eria bilong polisi em; helt, edukesen, lo na oda, na infrastraksa. Na gavman i putim fri edukesen na olgeta pikinini long kantri i kisim fri edukesen.

Em i tok dispela polisi i lukim planti ol pikinini meri i go long skul na namba bilong pikinini i go skul em moa long 2 milien. Na em i tok gavman i wok yet long apim namba bilong ol tisa na putim moa klasrum wantaim haus bilong ol tisa.

Minista long makim maus bilong Prais Minista O'Neill i tok PNG em i stap olsem bris namel long Pasifik Ailan kantri na ol arapela kantri bilong APEC.

Em i tok gavman bilong O'Neill i laikim ol gavman dipatmen iong mekim planti wok bilong APEC long strongim toktok na pren long bisnis na ikonomi long sapotim komyuniti na pipel bilong yumi long ol kain kain rot.

Dispela em wanpela bikpela miting na Minista Abel i tok PNG gavman i statim ol wok pinis long holim bikpela APEC miting long 2018 long Pot Mosbi.

Manus i gat nupela disain bilong polis stesen na hetkwata

NUPELA disain o stail bilong Manus Provinsel Polis Hetkwata na Lorengau polis stesen i op long namba tu stekholda konsaltesen miting long Manus long las wik.

Dispela konsaltesen miting bilong gavman bilong Australia long lukim ol nid bilong ol komyuniti na developim ol biling we i bin stat las yia. Dispela nupela polis stesen na polis hetkwata long Manus tu em gavman bilong Australia i fandim we ol i tingting long pinisim long 2016.

Long dispela miting, ol akitekta na ol projek tim lida i kamap wantaim wanpela stail ol i wanbel long en. Insait long miting em Gavana bilong Manus, Charlie Benjamin, Deputi Polis Komisina, Awan Sete na planti ol bikman

bilong Dipatmen ov Lo na Jastis wantaim Dipatmen ov Papua Niugini Royel Konstabluri i stap insait.

Gavana Benjamin i tok dispela infrastraksa i no bilong mekim polis sevis i go bikpela, tasol em i bilong apim spirit bilong ol pipel long Manus.

Em i tok moa olsem dispela bai strongim luksave na patnasip wantaim Australia.

Em i tok Manus em liklik provins i no gat planti infrastraksa tasol nau bai ol i gat wanpela polis stesen we ol bai amamas long en.

Hai Komisina bilong Australia, Deborah Stokes, i tok long toktok wantaim ol stekholda em bikpela samting long karim aut fainel prodak long helpim komyuniti.

Em i tok mipela i laikim ol pipel bilong Manus long amamas long dispela bikos em polis stesen bilong ol.

Em i tok dispela disain bai givim proteksen long ol famili na seksual vailens na ol pipel wantaim disabiliti tu.

Long wankain taim, Deputi Polis Komisina, Awan Sete i tok, "Wantaim olgeta sekta i wok bung wantaim long givim sevis dispela em mipela olgeta i laikim. Mipela ol polis i amamas long wok bung wantaim Provinsel Edministresen long stretim ol isu i kamap long Manus."

Long dispela gavman bilong Australia i givim K10 milien long developim ol hap gen insait long PNG-Australia Lo na Jastis Patnasip – Trensisen Program.

Basil singaut long Politikel pati glasim gut lo

Stanley Nondol i raitim



Pangu Pati lida, Sam Basil.

LIDA bilong Pangu Pati na deputi lid bilong oposisen, Sam Basil i singaut long rejistra bilong politikal pati na kandidate,

Dokta Alphons Gelu long lukluk gut long tingting bilong kamapim lo bilong ol politikal pati bai sanapim ol meri kandidate long ileksen.

Mista Basil i tok tingting billong rijistra long politikel pati bai sanapim 10 pesen bilong long meri kandidate em bikpela namba tumas.

Dokta Gelu i tokaut long pablik long midia olsem opis bilong politikel pati na kandidate bai kamapim wanpela nupela lo long ol politikal pati husat bai ran long ileksen i mas sanapim 10 pesen bilong ol kandidate i mas ol meri.

Dokta Gelu i tok klia

Pangu Pati lida i tok sapos Pangu i sanapim 30 kandidate, 10-pela bai ol meri. Tasol em i tok dispela em i no stret bikos 10-pela em bikpela namba. Na sapos pati i no painim ol meri i gat lidasip kwaliti na i no gat inap mani long sanapim planti kandidate i no stret long nupela lo.

Mista Basil i tok em sapotim opis bilong politikel pati na kandidate long wok bilong en long strongim ol politikal pati long kantri tasol i sinagut long Dokta Gelu wantaim tim bilong em long stretim gut long bipo long palamen i givim tok orait.

"Ol politikal pati bai sanapim ol meri maski ol i gat lidasip kwaliti o nogat long ol i no ken abrusim lo. I luk olsem sapos mi ken putim nominesen bilong pati na ol meri nabaut long

ples long kamap kandidate long pati bilong mi ken ken bungim mak bilong meri kandidate aninit long nupela lo" Mista Basil i tok.

Long wankain taim Mista Basil i singaut long ol pipel bilong kantri long save gut long ol polisi bilong ol politikal pati na votim ol kandidate bilong pati.

Em i tok maski kantri gat planti risos na gavman tokaut long bikpela winmani, planti ol rurel ples long kantri i kisim taim long ol besik sevis oslem komyunikesen na rot na bris.

Em i tok planti ol rurel pipel i no save long bikpela samting i kamap long gavman na kantri bikos i no gat gutpela komyunikesen sistem stap long ples. Em i tok planti hap i no gat radio sevis, televisen na niuspepa na dispela em bikpela hevi.

Olgeta samting bai redi



Gavana Parkop i opim lait swis long Ward Strip rot. Poto na stori - Nicky Bernard.

GAVANA bilong Nesenel Keptial Distrik, Powes Parkop i tok olgeta samting bai redi long taim, bipo long Pasifik Gem bai kamap. Em i mekim dispela tok bihain long em i opim strit lait long rot long Ward Strip we bai go stret long bikpela Sir John Guise Stadium long Mosbi long Sarere long wik i go pinis.

Parkop i tok, sampela

hap bilong sindaun na lukim pilai bai i no inap redi tasol taim pilai pinis bai dispela ol hap bilong pilai bai senis olgeta.

Em i tok tu olsem long Sir Hubert Murray Stadium long Kone bai i no inap redi long wanem dispela stadium bai gat 6-pela stori haus na em bai bikpela moa yet.

Parkop i bin putim ol lait

long dispela rot we ol Phoneix Bildas bin mekim long mani mak bilong K290,000.

Phoneix i bin kisim kontrak long mekim ol stret lain long siti na ol bin mekim gutpela wok tru.

Long sampela wik i kam bihain bai ol i putim on ol lait long nupela fri we rot long Jackson ples balus kam olgeta long Waigani.

Talk more for just K1 a day

Subscribe to our K7 weekly pass.
Dial *123*7#.

Contact us now!

Customer Care 76003555

support@bmobile.com.pg

www.bmobile.com.pg

Get 7 days
UNLIMITED FREE CALLING
Between Bmobile-Vodafone numbers

20 MB
Internet data

10 MIN
Calls to any network in PNG

20 SMS
Text to any network in PNG



PNG pipel gat naispela pasin...

Olpela Word bosman kam raun long PNG

Veronica Hatutasi i raitim

“NAISPELA ples, gutpela pipel wantaim gutpela pren pasin” em toktok we 4-pela lain pipel bilong Amerika i wokim taim ol i kam raun long *Word Pablisig* kampani em papa kampani bilong *Wantok Niuspepa* long dispela wik.

Rose Sternberg na Jane Buckley em tupela susa bilong Iowa, Zoe Arkfeld em kasen bilong ol na Emma Wingert em narapela susa bilong Nebraska i bin kam long PNG tupela wik i go pinis long lukim matmat long Wewak bilong ankel o kandere bilong ol, Bisop Leo Arkfeld SVD, bilong Wewak Katolik Daiosis husat i bin dai long Ogas 1999 na ol i planim em long hap.

Namba tu as tingting ol lain i kam long PNG em long stap insait long odinesen bilong nupela bisop bilong Wewak, Bisop “Big Joe” long Epril 25, 2015.

Planti pipel i save long Bisop Arkfeld olsem long “Flying Bisop”.

Ol i givim em dispela nem long wanem, em i wanpela pilot bilong balus na long yangpela bilong em long ol 1960's, 70's na 80,s taim i no gat gutpela trenspot sistem long kantri, em i save ranim balus long mekim wok misin, karim ol misin woklain, ol nes na dokta na ol marasin saplai na ol siklain, ol tisa na ol metiriel bilong skul na ol narapela wok moa olsem long ol autstesen insait long Momase rijon.

Wantaim 4-pela meri, olpela bosman na Fainensel Kontrola bilong Word Pablisig kampani em Pater Vince Ohlinger SVD tu i kam. Pater Vince em i brata bilong tripela susa meri nem bilong ol antap na kasen bilong Zoe.

Em i namba tut aim bilong Rose long kam long PNG, tasol em i namba wan taim bilong Emma, Jane na Zoe, tasol ol i laikim stret wokabaut bilong ol i kam long PNG.

“Mipela i bin gat gutpela taim stret long PNG, toktok wantaim planti na harim ol stori long ol samting i kamap long kantri.

“Gutpela tru long lukim ol narakain pipel, tasol long wankain taim, planti samting i wankain namel long ol,” Zoe i tok.

Yangpela Zoe i bin pinisim skul long Yunivesiti bilong Santa Cruz long California, Amerika nae m i stadim kombain Antropolji na Sosioloji wantaim fokus long Latin Amerika. Nau em i skul long Masta Digri bilong em long Bisnis Developmen.

Em i laik kam bek long PNG na skruim wok long helpim ol pipel long PNG olsem ankel bilong em “Flying Bisop” na tu, Pater Vince husat i bin wok long PNG moa long 30 krismas.

Pater Vince i bin lusim PNG log yia 2001 na nau em i stap long ritaia SVD Haus long Wisconsin, Iowa.

Bihain long stap aut long PNG long 14 krismas, Vince i tok bikpela senis em i lukim em “planti moa pipel long taun na olgeta hap, na ol rot, moa yet long Hagen na Goroka, i bagarap moa.

“Tasol pipel i stap wankain, amamas wantaim gutpela pasin na prenpasin i stap long olgeta taim.

“Long Mosbi, wanpela senis mi lukim em planti raunabout, na planti wok long ol rot i go het na mi paul liklik long sampela hap.

“Mi tok tenkyu long ol woklain bilong Word long skruim yet wok bilong kamapim yet Wantok Niuspepa.

“Mi amamas tru long kam raun gen i kam long PNG, tasol tuhat i wok long kilim mi,” Pater Vince i tok.

Grup i lusim PNG aste, Trinde, tasol Pater Vince bai stap liklik moa na lusim kantri long dispela wiken, Sarere.



OL VISITA NA WANTOK WOKLAIN: Olpela Wantok bos, Pater Vince Ohlinger SVD, (namel long ro 2), tripela susa na wanpela kasen (long fran) na ol Word Pablisig woklain. *Poto: Nicky Bernard*

2015 Pacific Games **TICKET GIVEAWAY!**

Simply do a **FUNDS TRANSFER*** via BSP Mobile Banking during **MAY** to be selected. Customers will be contacted directly with details posted on BSP's Social Media.

TRANSFER FUNDS NOW *131#



20 x general admission double passes plus 2 major passes to be given away weekly.

www.bsp.com.pg f t

* Excludes Funds Transfers between own accounts.



Official Sponsor of the 2015 Pacific Games

Polis i asua long Hanuabada trabel

Esther Bralyn Wani i raitim

OL wok painimaut i soim olsem polis i asua long dai bilong tupela man long Hanuabada, Nicholas Rarua na Toka Gaudi long 23 Janueri long dispela yia.

Tasol ol hap bullet ol i rausim long bodi bilong Nicholas Rarua i soim olsem em i no wanpela gan bilong ol polis ol i bin mekim tes long en.

Ol investigeta o ol man bilong painimaut i lukim olsem 6-pela Polis Yunit i bin stap insait long dis-

pela hevi wantaim ol Nesenel Kapitot Distrik Komisn (NCDC) Risev. Ol i painimaut olsem ol i bin holim 13 gan, metropolitan koman i bin givim aut 11-pela gan na tupela bilong Polis Hetkwata.

Ol pipel i bin kisim 9-pela karamap bilong ol bulet na givim long ol Kraim Opisa long taim bilong wok painimaut. Olgeta karamap i bin miks na ol i no bin save wanem hap ol i kisim long en. Tasol wanpela emti sel ol i kisim long hap i makim gan bilong Hohola polis.

Ol pipel i ripot olsem ol polis i mekim tasol ol i no makim wanpela husat i sutim tupela man.

Long wankain taim, ol i painimaut olsem 168 witnes tasol 149 witnes i raitim stetmen na givim. Olsem 11-pela stetmen i kam long ol polis investigeta na 3-pela long ol dokta i mekim pos motem.

Asisten Komanda Jerry Frank i tok, "Em bai givim olgeta ripot long ACP Kraim, Dairekta Kraim na DCP Operesen long lukim gut."

Em i tok bai ol i mas givim long Korona long mekim fainel disisen

bikos em i stap long Koronas Ekt long seksen 7(1) olsem Korona i gat olgeta pawa insait long lo long lukim gut dispela samting na painimaut wanem as bilong wanpela lain i dai long kain rot (j) na long tingting bilong Atoni Jenerel long as bilong dai na wanem rot em i dai long en ol i mas save gut na klia.

"Ol pablik i no wanbel na ol i gat intres long lukim lo i painimaut long wanem em gutpela long givim ol ripot long Korona na Korona Inkwes long mekim dispela," Asisten Komanda Frank i tok.



Asisten Komanda Jerry Frank i tok tok long ol nius ripota.

Rausim plastik long Kiunga taun

SAPOS ol pipel bilong Kiunga taun i laikim klinpela taun orait namba wan samting em long rausim ol plastik na ples bai stap klin.

Dispela tok em Sif Eksekutiv Opisa bilong Ok Tedi Developmen Faundesen, Ian Middleton, i tok taim em yet wantaim ol wok man na meri bilong OTDF wantaim sampela lain husat i save stap long taun, ol kampani na gavman lain i bin bung na, klinim taun wantaim.

Dispela em i namba wan taim bilong OTDF *Komyuniti Dei* klin-a-ton we ol i bin mekim long Epril 18, na ol bai mekim olsem olgeta mun.

Mista Middleton i tok OTDF bai mekim sait bilong em long klinim taun olgeta wan wan mun stat long Februeri 2015, stat long taim OTDF i karim olgeta wokman meri bilong operesen bilong en long Tabubil i go long Kiunga.

Moa long 200 pipel i bin kamap long wokim dispela bikpela klinap.

Ol woklain bilong Ok Tedi Maining Ltd, Benk Saut Pasifik, Hore Binkia Sekyuriti, Flai Riva Provinsal Gavman, Bugum Invesmen Ltd, Puma Energy, BSD Ltd, Starwest Konstraksen Ltd, Kiunga Intenesenel Skul tisa na ol wokman na meri, Abt-Jta, Not Flai Hadwe, Polis na Difens Fos, Kiunga LLG, na ol komyunit long Sare Kona.

Mista Middleton i tok tenkyu long ol lain husat i mekim klinaton. Ol i katim bus, kisim ol pipia, klinim ol baret stat

long ples balus i go long hap bilong ol bikpela stua long taun inap ol i pinisim long Sare Kona.

Planti pipia long ai bilong ol stua em ol plastik bek na ol karamap bilong ol loli. Mista Middleton i tok, ol plastik i no save sting olsem na ol i save kamapim bikpela hap bilong ol pipia long taun na olgeta lain i mas wok wantaim long rausim ol plastik.

Em i tok ol lain papa bilong ol stua i mas mekim wok bilong ol long larim ai bilong stua bilong ol i stap klin na ol i mas baim ol rabis dram long putim long ai bilong stua.

OTDF yet bai statim dispela wantaim sampela rabis dram ol bai putim pastaim long Kiunga taun na bai ol i baim ol lain i kisim pipia long 2015, long soim piksa bilong gutpela pasin bilong stap helti na klin.

Star Wes Konstraksen Ltd i putim han long givim winis long karim ol pipia bilong kar long ol sait bilong rot i go long rabis ples.

Ol narapela lain olsem Kiunga Eben LLG Presiden, Sare Kona, Provinsal Polis, PNG Difens Fos Kiunga, BSP Kiunga Brens, Bugum Invesmen Kiunga Town Meia na Airlines PNG olgeta i givim tok promis long helpim yet long klinim Kiunga taun long mekim i stap wanpela helti taun.

Narapela klinaton bai kamap insait long dispela mun.



Rausim ol tin long ol baret wantaim savol.



Kiunga yut rausim pipia na stretim ol hul long rot.

Awenes bai kamap long redio long Bogenvil

OPIS bilong Bogenvil Ilektral Komisina (OBEC) i kisim Redio Ples Lain (RPL) bilong Atonomas Bogenvil Gavman long mekim awenes bilong ileksen long Sentral na Saut Bogenvil. Dispela redi awenes program i stat long Mande na bai pinis long dispela wik Sarere.

Ektong Ilektral Komisina, George Manu i tok OBEC i kisim RPL long karim aut awenes program long tok klia na skulim ol pipel long Bogenvil long impotens bilong dispela ileksen.

Em i tok moa olsem ol i kisim ol awenes opisa tasol wantaim RPL bai i mekim moa klia long ol hap we i gat nid bilong moa

awenes program.

Dispela brodkas bai i tokaut long ol bikpela samting olsem ol bikpela de bilong ileksen, ol kain kain lida long votim, long yusim limitet preferensel voting (LPV) sistem, na planti moa.

RPL bai statim awenes program long Kongara kontituensi long Sentral Bogenvil na go aut long ol narapela ol distrik olsem Kieta, Panguna, Buin, Siwai na Torokina distrik long wan wan de insait long dispela wik.

Mista Manu i askim ol pipel long dispela ol distrik long harim gut ol awenes long redio na salim toktok go aut long ol narapela tu.

Deputi Kureta bilong Momase Rijen i raus long opis

OL i arestim wanpela senia pablik sevan husat i save wok wantaim Dipatmen ov Atoni Jenerel long Lae, las wik.

Ol i arestim Deputi Kureta bilong Momase rijon, Kali Ralewa bilong Sentral provins long misapropriesen, fols pritens na stil. Mista Ralewa i wok wantaim Opis bilong Pablik Kureta, Dipatmen ov Atoni Jenerel inap 20 krismas.

Seketeri bilong Jastis na Atoni Jenerel Dokta Lawrence Kalinoe i tok, "Frod Skwat i arestim Rawela las wik long Lae na dipatmen tu i saspensim em long wok na no

inap kisim gat pe.

Em i tok moa olsem senia opisa na dipatmen i trastim em na givim em dispela wok long lukautim estet bilong ol lain i dai, Deputi Kureta Rawela i no yusim gut dispela tras.

"Mipela i pilim orait wantaim dispela arest bikos em i inosent nau tasol, mipela i ekt olsem Dipatmen long wanem mipela i no laikim ol wokman bilong mipela long mekim kain pasin," Dokta Kalinoe i tok.

Dokta Kalinoe i tok dipatmen i save tok nogat stret long kain

pasin olsem long dispela sapos wanpela i mekim olsem gen bai wankain samting bai kamap long em.

Em i tok moa olsem opis bilong Pablik Kureta i save mekim bikpela wok long skelim estet bilong ol lain i dai pinis long wanem Pablik Kureta wantaim husat i wok insait long dispela opis i gat bikpela wok insait long lo. Em i tok husat i no bihainim dispela bai i go long kot, bikos ol i mas kisim sapot long pablik long skelim ol samting bilong ol lain i dai long ol famili bilong ol.

Bihain long 30 yia na bai soim pes gen

Nicky Bernard i raitim

“BAI MI SOIM PES GEN LONG SP GEMS”, Dispela tok i kam long wanpela Meri Woda husat bai mekim wok bilong em long Pasifik Gems bai kamap long Julai 4 long Pot Mosbi.

Lance Kopul Cathy AnGura bilong Pangia long Sauten Hailens Provins i bin joinim polis woda long 1985, dispela yia bai 30 krismas bilong em olsem polis woda meri long Bomanana.

Taim em yangpela meri yet olsem woda, em bin joinim paip na dram bilong CIS na em save paitim wanpela dram, dispela i

givim sans long wok olsem polis woda meri long lukautim ol meri kalabus na sans long raun na pilai long ol bikpela seremoni.

Long 1991 taim em stap 6 yia tasol long Woda, namba 9 Saut Pasifik Gems bin kam long Pot Mosbi na dispela givim em bikpela sans long pilai long opening seremoni na taim bilong pasim pilai.

Em tok dispela taim em yangpela meri na em fri stret long mas na pilai ben wantaim ol wan wok bilong em na sampela ol soldia we ol bung wantaim long pilai paip na dram long opim na pasim Pasifik Gems.

Bihain long 1991 ol bin salim em go long ol Hailens Provins we em wok olsem woda meri tasol long lukautim banis kalabus. Long dispela taim nau Cathy painim hap sait bilong em na kamapim liklik famili bilong em.

Cathy lusim Hailens na kam bek long Mosbi sampela yia bihain, na em kisim luksave na kamap olsem Lens Kopul, nau em i gat 5-pela pikinini.

Cathy bai wok long Pasifik Gems long Mun Julai long lukautim ol spot manmeri long Pasifik taim ol kamap long kanti bilong yumi. Tasol Cathy yet i no save bai em pilai wantaim ol paip na dram o bai putim was

tasol. Em i tok nau em hevi liklik long mas na pilai dram, tasol sapos ol wan wok askim em bai em stat long trening na kisim stail bilong bipo kam bek.

“Mi amamas long wok gen long dispela Pasifik Gems, taim mi yangpela mi mas na opim na pasim Saut Pasifik Gems na bai mi wok gen long dispela bikpela Pasifik Gem we i kam bek long Papua Niugini na mi amamas stret long wok long lukautim ol manmeri kam kantri bilong yumi”, Cathy i tok.

Cathy wantaim ol wan wok bilong em i save lukautim Telikom Nesenel Soka Lig long graun bilong Bomanana CS kolis na dispela soka resis save ran.



Lance Kopul Cathy AnGura.

Moa pipel kisim bagarap long Afghanistan

DAIREKTA bilong Operesen long Intenesenel Komiti bilong Red Kros (ICRC), Dominik Stillhart, i gat bikpela wari long moa pipel husat i no pait tasol i wok long kisim bagarap na i dai.

Em i tok pait namel long ol Afghanistan ami na ol rebel lain em i no gutpela bikos mani sapot bilong ol pipel long kantri i wok long go daun yet.

Mista Stillhart i tok ICRC i wari long planti pait wantaim gan i wok long kamap klostu, klostu long ol pipel husat i no stap long pait na planti lain i dai pinis. Em i bin go lukluk raun bihain long 18 April taim ol rebel lain i bin bagarapim ol pipel long Jalalabad na kilim 33 pipel na givim bagarap long bodi long 100 moa.

“Bikpela laikim bilong ol pipel long Afghanistan i no wok long go daun. Em i wok long go antap. Mipela i lukim pait tu i wok long go strong yet,” ICRC Dairekta bilong Operesen i tok.

ICRC i bin helpim 345 pipel husat i kisim bagarap long gan,

long go painim ol haus sik long kisim helpim. Ol i kisim ol aninit long ol gan pairap wantaim long stat bilong dispela yia.

Mista Stillhart i tok i kam inap nau em ICRC singaut bilong ICRC long 2015 i lukim 25 pesen tasol bilong mani helpim ol i nidim bilong helpim ol lain sivilen i kisim bagarap long Afghanistan. Long dispela taim Mista Stillhart, i bin bungim ol senia Afghan opisa we em i toktok long sampela hevi bilong ol pipel husat i ranawe long pait na lusim ples bilong ol.

Em i toktok wantaim Presiden bilong Afhan Red Kresen Sosaiti (ARCS) Fatima Gailani na toktok long ol hevi bilong ol pipel long kantri na wok wanbel bilong tupela ogenaimesen.

Namel long Janueri na Mas 2015, ICRC i givim seif wara long 80,000 pipel, sampela moa helpim bilong helpim sindaun i go long 35,000 pipel na i wokim klostu long 5,000 giaman han na lek long ol lain husat i no gat ol han na lek.



Wanpela dokta i was long wanpela boi husat i kisim bagarap, insait long Mirwais Haus sik. Poto: Will Carter/ICRC



Wanpela ICRC orthopaedic teknisen i stretim giaman lek bilong wanpela disebol man insait long ICRC Orthopaedic Senta. Poto: Jake Simkin/ICRC



ICRC givim kaikai long ol pipel i lusim ples bilong ol (IDP) long Charikar insait long ARCS helt klinik. ICRC. Poto: Ghulam Muhaiuddin Sayad/ICRC

Ol Yangoru-Saussia sumatin i kisim sabsidi long teseri intitusen

OL sumatin bilong Yangoru-Saussia Distrik long Is Sepik provins i save skul long ol Yunivesiti na Kolis i kisim K500, 000.00. Wan wan sumatin bai kisim K1, 000 olsem Teseri Skul Fi Sabsidi.

Minista bilong Tred Komes na Indastri na memba bilong Yangoru-Saussia Distrik, Richard Maru, i tok aut long dispela long las wik olsem Distrik bilong ol i rausim mani pinis long givim i go long ol skul.

Taim Minista Maru i

mekim dispela toksave em i tok olsem 500 teseri sumatin tasol bai inap long kisim dispela skul fi sabsidi.

Ol i kisim dispela sabsidi long Yangoru-Saussia Distrik Impruvmen Program (DSIP) aininit long Edukesen sekta.

"Dispela de em i amamas de bikos mipela i mekim histori long Yangoru-Saussia Distrik," Minista Maru i tok.

Em i tok moa olsem long kamapim dispela skul fi sabsidi bilong ol sumatin long Distrik bilong em i nupela samting

long Distrik.

Minista Maru i tok tenkyu long Yangoru-Saussia Join Distrik Baset Praioroti Komiti (JDBPC) long wanbel long sapotim dispela nupela sabsidi skim.

Long wankain taim, Sif Eksekutiv Opisa bilong Distrik Developmen Atoriti, Fanston Yaninen, i mekim wankain toktok olsem dispela tingting em i nupela samting long histori bilong Distrik na em i pilim laki long wok aninit long kain lidasip bilong ol lokal memba olsem.

"Luksave long ol nid bi-

long ol pipel bilong mipela long developmen em i bikpela amamas taim yumi mekim ol kain samting long sevim ol pipel bilong yumi," Mista Yaninen i tok.

Minista Maru i tok dispela skul fi sabsidi i bilong ol papamama long viles o husat i stap insait long Distrik long helpim ol long skul fi. Em i tok moa olsem husat peim pinis i ken rausim mani bilong em bihain o putim moa sapos skul fi i winim K1000,00 mak bilong sabsidi.

Bogenvil karimaut ileksen trening

YUNAITET Nesens Developmen Program (UNDP) i statim wanpela trening program bilong ol manmeri husat bai was long taim bilong ileksen, ol Ritening Opisa, na ol midia long Bogenvil.

UNDP i mekim dispela trening Bilong helpim ol lain i klia long rot bilong 2015 Bogenvil jenerel ileksen bai stat long neks wik Mande. Ol bai sapotim ran bilong ileksen obsevesen grup, givim sapot long ol meri kandidate, na givim sampela skul ekasesais.

"Ileksen Stekholda olsem ol manmeri husat bai lukautim ileksen, ol Ritening Opisa na midia em ol bikpela hap bilong rot long ileksen. Long

luksave olsem ol i save gut long wok bilong ol na ol rot bilong ileksen, mipela i promotim gutpela ileksen," tim lida bilong UNDP, Ray Kennedy i tok.

Long wankain taim, eking Komisina bilong OBEC, George Manu, i tok, "Dispela ileksen em i bikpela samting long Bogenvil. OBEC i amamas long sapot bilong UN we bai i bikpela hap bilong demokretik ileksen."

Trening bilong ol lain husat bai lukautim ileksen bai go moa olsem 720 pipel na bai mekim ol i luksave long we bilong ranim ileksen na ol wok bilong ol long wanem, sapos sampela wari i kamap long taim bilong poling na kauning bai ol i save gut.

UNDP bai mekim

isi long ol liklik grup na wan wan man diskasen wantaim ol 19 Ritening Opisa bilong Bogenvil, na luk long ol proses long Opis bilong Bogenvil. Ilektral Komisin (OBEC) long lukautim ol komplek long taim bilong poling na kaunting. Dispela long luksave olsem ol komplek ol i stretim gut long gut na klia.

Long wankain taim, midia trening bai makim ol midia haus long Bogenvil. As tingting bilong dispela trening em long redim ol nius ripota na helpim ol long save gut long rot bilong ileksen long stretpela rot, wankain pasin na wantaim sapot bilong ol bai ol pablik i save gut na mekim gut ol politikel disisen.

Ol NGO i bung long mekim gut litresi bilong ol bikpela manmeri

PAPUA Niugini Edvokesi Network (PEAN) wantaim Edventis Developmen Rilif Ejensi (ADRA PNG) i wok bung long helpim gavman na developim kantri long mekim gut litresi long ol bikpela manmeri.

PEAN i kisim kontrak wantaim ADRA PNG long karim aut wanpela sevei long ol bikpela manmeri litresi long ol hap long ADRA insait long NCD na ol Niugini Ailan rijon long painimaut litrei dileveri sevis bilong ol bikpela manmeri namel long ol provinsal gavman na husat i save

givim litresi sevis long ol dispela hap.

Ol wok painimaut bilong dispela sevei bai givim strong long ADRA PNG long painim aut ol plen long strongim patnasip wantaim ol bikpela patna long olgeta gavman level na developim ol inisitiv long bildim hap bilong ol stekholda long lukautim gut, sapotim na karim aut litresi program.

Eksekutiv Dairekta bilong PEAN, Priscilla Kare i amamas long ADRA PNG long implementim ol dispela plen bilong Patnasip we i strongim menesmen long ol risos bilong en.

Em i amamas olsem dispela i givim sans long PEAN long sapotim wok bilong gavman long karim aut sevis.

"Dispela em i namba wan wok bung namel long PEAN na ADRA PNG we ol i serim ol save na risos long helpim ol pipel.

Wok bilong mipela olsem rises na polisi edvokesi ogenaísesen em long helpim ADRA PNG long kamap wantaim narapela projek long helpim gavman long developmen visen bilong en," Mis Kare i tok.



Papua Niugini NESENEL AIDENTITI PROJEK



Gutpela bilong yu gat Nesenel ID Kat bilong yu yet



**Edukesen/
Skul**

- ▶ Em isi long putim nem bilong pikinini bilong yu long skul.
- ▶ Yu inap kisim helpim bilong gavman long baim skul fi.

"Yu mas Rejista nau na stap insait"

Depatman bilong Nesenal Plening
i go pas long dispela



Skul pikinini lainim we bilong wasim han

WARA i gat bikpela wok long lukautim bodi long em i stap laip na strong.

Wara em i save kamapim 60 pesen bilong bodi na em i karamapim 71 pesen bilong graun. Sapos no gat wara bai i no gat laip long dispela graun.

Oi pipel i save dring wara na yusim long mekim planti narapela samting long laip bilong ol.

Oi pipel husat i no gat inap wara bai no inap long waswas gut na wasim ol samting ol klos na ol samting long haus.

Long sampela hap bilong graun ol i save laikim long wasim olgeta bodi tasol long ol narapela hap we wara i sot, ol i ting olsem waswas olgeta i save westim wara.

Long wanpela beslain sevei bilong Wol Visen long Sauruan Komyuniti long Markham Distrik Morobe Provins, Wol Visen Wara Senitesen na Haijin (WASH) projek tim i painimaut olsem planti famili i no save yusim wara long wasim han bihain long ol i go long toi-let.

Oi i tok karim wara long liklik wara em i hatwok olsem na ol i no laik wetim wara.

“Bodi bilong yumi i gat moa wara na

olsem em i nidim moa wara long em inap long mekim wok bilong em. Em i wanpela nid olsem na em i bikpela samting long yumi mas gat inap wara,” Wattie Wando, Projek Menesa bilong Morobe WASH Projek i tok.

Mista Wando i mekim dispela toktok long Wol Wara De i bin kamap long Ampan Praimer Skul long Markham Distrik long 22 Mas dispela yia.

Mista Wando i tok strong moa olsem long ol pipel bai i no ken kisim sik long bel olsem dairia o pekpek wara, ol i mas wasim han olgeta taim.

Em i tokim ol long lukautim gut ol samting Wol Vision i putim wantaim sapot bilong Australia Gavman.

Oi sumatin bilong Ampan Praimeri skul i lukim nupela samting stret long taim Wol Visen WASH project tim i kamapim de bilong selebretim wol wara de long skul bilong ol.

Oi i amamas long Wol Visen na het-masta bilong sku, Rex Kalna i tok olsem bihain taim ol bai mekim luksave long dispela de olgeta yia long skul bilong ol.

Oi sumatin i redi gut na i putim ol drama pilai, danis na singim song long bringim toksave bilong wara i go long komyuniti.



Oi sumatin sanap long fran bilong gren sten ol i bilasim wantaim ol piksa bilong wara.

WOM helpim ol pikinini

WOM em i sotpela nem bilong ‘Women on the Move’ (Oi meri i wok-abaut), em i wanpela ogenaísesen bilong ol meri long Pot Mosbi we i save helpim ol meri long mekim eksesaís na stap helti.

Long Sarere Epril 2 Misis Janet Sios, meri i go pas long ‘Oi meri i wok-abaut’ i go wantaim 20 memba bilong grup long Gerehu long bringim sampela gutpela abus long ol pikinini bilong Life Care PNG husat i stap aninit long lukaut bilong Collin na Freda Pake Famili Hom Kea Senta.

Oi i bringim planti sosis na mit wantaim bret na ol prut na kukim bilong ol pikinini. Em i namba wan taim long ol i kam helpim ol dispela pikinini tasol, Misis Siosi i tok nau bai WOM i kamap patna bilong Life Care PNG.

Misis Siosi i bin tokaut long dispela taim olsem, Faunda bilong WOM, Lyn Ni Cragnolili husat i hetmeri bilong

PM Peter O’Neill Faundesen i bin putim K10,000 i kam long PM Peter O’Neill Faundesen long helpim dispela Famili Hom Senta, pastaim long em i go long Australia.

“Mipela i liklik grup tasol bilong ol meri husat i wari long helt bilong ol meri na mipela i wokabaut long ol liklik rot bilong Pot Mosbi long mekim eksesaís. Wanpela bikpela tingting bilong meri husat i kamapim dispela grup, Mis Lyn Ni Cragnolini em long helpim ol kain gutpela wok bilong strongim kantri,” em i tok,

WOM i gat 30 pul taim memba husat i save wokabaut olgeta moning inap long 5 kilomita insait long 1-pela aua insait long ol liklik han rot bilong Pot Mosbi.

Sampela taim ol i save wokabaut wantaim ol polis na tu long ‘Oi Mai Mosbi’ wokabaut bilong Gavana Powes Parkop.

ME 5 em i Wol De bilong tingim ol Midwaif, em ol meri na man husat i save helpim ol mama long taim bilong karim bebi.

Yunaitet Nesen Populesen Fan (UNFPA) i tok tenkyu long olgeta midwaif long olgeta hap bilong graun long sevim ol laip wantaim wok ol i mekim.

Wanpela strongpela stori bilong dispela kain gutpela wok em i kamap long wanpela bebi nem bilong em Obada, em i namba 3,000 bebi we i bin bon long women klinik insait long Za’atari Syrian refuji kemp long Jordan. Long taim klinik i bin kirap long givim sevis bilong karim pikinini long June 2013, ol bebi i bin bon long dispela hap gut na i no gat sik, na i no gat wanpela i dai, na bebi Obada em i wanpela bilong ol.

Bihainim mak bilong Gol 5 bilong Milenium Dvelopmen Gol (MDGs) long kamapim gutpela matenel helt, mipela i gat

bikpela amamas long long tokaut olsem namba bilong ol mama i dai long taim bilong karim bebi i go daun long hap namba, olsem klostu long 523,000 long 1990 nau i stap long 289,000.

“Dispela em i gutpela mak, tasol em i no inap yet. Tude, klostu 800 meri i wok long dai yet long wan wan de bikos long hevi bilong karim pikinini o long i gat bel. Mipela i mas mekim moa wok. Na mipela bai stat wantaim trening bilong ol midwaif,” Dokta Babatunde Oso-timehin, Eksekyutiv Dairekta bilong UNFPA long wol i tok.

Dokta Babatunde i tok, ol i gat ol piksa i soim olsem ol midwaif husat i save kisim skul klostu, klostu na i bihainim intenesenel standet inap long givim 87 pesen bilong ol gutpela lukaut we ol meri na nupela bebi i nidim.

Em i mekim singaut long ol gavman i mas putim moa mani

long helpim moa midwaif i ken mekim gutpela wok long helpim ol mama na bebi.

“Strongpela tingting bilong gavman long putim moa mani long wok bilong trening na lukautim ol midwaif em bai sevim planti milien laip long wan wan yia,” Dokta Babatunde i tok.

“Tude na olgeta de, yumi mas go klostu, klostu long pasim dispela baret bilong yunivesal seksual riprodadktiv na matenel nubon helt kea,” Dokta Babatunde i tok.

UNFPA bai strongim yet wok bilong midwaif na seksual riprodaktiv helt na riprodaktiv rait long olgeta meri. Tude UNFPA i save putim mani long helpim 250 skul bilong ol midwaif wantaim ol buk, trening ikwipmen na ol ples bilong skul, na em i helpim long trenim moa long 15,000 midwaif long wol. UNFPA i save sapotim wok bilong midwaif long 70 kantri long wol.

WOM ‘Oi meri wok-abaut’ grup kisim pototo wantaim ol pikinini bilong Life Care PNG na ol narapela gutpela man husat i givim helpim tu.



I gat gutpela Samaritan i stap long Pot Mosbi

Frieda Sila Kana
i raitim

'GUTPELA Samaritan' em nem yumi save givim long ol lain husat i save helpim nating ol narapela husat i gat bikpela nid o i no gat wanpela samting long helpim ol yet.

Stori bilong ol pikinini i no gat papamama na i no gat haus bilong slip long Pot Mosbi i bin kamap bikpela stori long sampela taim nau. Insait long 10-pela yia samting i bin gat ol stori bilong ol wan wan manmeri na ol grup i kamap long pasin ol i save mekim long helpim ol kain pikinini.

Mipela i bin putim stori bilong sampela ol pikinini bilong rot we wanpela man Collin Pake na meri bilong em Freda Pake i bin kisim na lukautim insait long rent haus bilong tupela yet long Pot Mosbi. Redio FM100 tu i bin toktok wantaim Mista na Misis Pake.

Tenkyu long ol gutpela Samaritan i stap long komyuniti olsem dispela ol stori i no go nating. Wanpela man kain olsem, em John Stanson, ISAS Grup Ltd Dairekta bilong Sales na Marketing long Sarere i go pinis i givim nating wanpela liklik haus sel haus long



Sampela pikinini bilong Family Home Care i sanap long dua bilong sel haus. Foto: Isaac Kana

Mista Pake bai kisim moa pikinini long rot na putim ol insait.

Life PNG Care i laik long kisim 70-80 moa pikinini i kam insait long lukaut bilong en tasol i no gat inap spes insait long haus bilong ol we ol i lukautim 22 pikinini nau.

Mista Stanson i bin givim dispela tent long helpim Life PNG Care Famili Hom Senta long Gerehu Stes 4, bai i ken kisim moa pikinini.

Mista Pake i tok dispela gutpela pasin em i bihainim toktok bilong gavman long long rausim ol pikinini i no gat haus na i save stap long ol rot bilong Pot Mosbi na putim

ol insait long sampela banis.

Dispela tingting bilong gavman i bin kamap long redi long 2015 Pasifik Gems, bilong wanem gavman i no laikim ol narapela lain bai i lukim olsem PNG i no lukautim gut ol sitisen bilong en.

"Mipela laik kisim 100 pikinini husat i no gat haus bilong slip tasol mipela i no gat graun na haus bilong mipela yet. Em i bikpela salens long mipela i kirapim ples bilong mipela yet, olsem na mi laikim ol lidaman bilong kantri i mas luksave na helpim. Mipela i ken lukautim ol pikinini long sotpela taim bilong 2015

gems tasol bihain bai mipela i larim ol i go bek gen long strit," Mista Pake i tok.

Mista John Stanson i tok em i pilim gut olsem em inap long mekim wanpela samting long helpim developmen bilong bilong PNG. Em i tok ol narapela helpim em i givim olsem long givim 6,000 buk bilong rit i go long Daru long ol pikinini long ples.

Narapela gutpela man husat i save helpim ol kain pikinini na gutpela komyuniti wok olsem em Peter White, wanpela wokman bilong Gavman bilong Australia. Em i save wok olsem Gavman transpot, sefti na sekyuriti opisa long Australia Hai Komisen long Pot Mosbi. Em i save givim samting olsem klos, kaikai, tent na bikpela tru em i save givim liklik taim long stori na pilai wantaim ol pikinini.

Wanpela moa man husat i gat bel long helpim dispela wok em wanpela bisnis man long Daru, Billy Mac Junior.

Na olgeta dispela man i bin bung bikos long gutpela wok poroman bilong Roger Hau'ofa bilong FM100 Redio Tokbek So, husat i bin bungim ol long dispela Family Home Care.



Yut, Meri na
Famili
Pastor Barbara
Lunge

God Papa, em yet i as bilong pasin bilong laikim!

Em i wokim wan wan manmeri long stap amamas na stap insait long pasin bilong laikim insait long laip wantaim em. Pasin bilong laikim ol samting bilong graun we God yet i kamapim bai bruk na lus taim yumi go insait long laip wantaim man i kamapim yumi na olgeta samting wantaim.

"Ol pren, yumi wan wan i mas laikim tru ol arapela, long wanem, pasin bilong laikim ol arapela em i pasin bilong God. Na man i laikim tru ol arapela, em i pikinini bilong God, na em i save tru long God. God yet em i as bilong dispela pasin bilong laikim ol arapela. Olsem na man i no save laikim ol arapela, em i no save long God. God i gat wanpela pikinini tasol, na em i salim dispela pikinini i kam long graun, bai yumi kisim laip long em. Long dispela pasin God i soim yumi olsem em i laikim yumi tru. Pasin bilong laikim ol arapela, em i pasin bilong God.

Yumi no ken ting, yumi bin laikim God pastaim. Nogat. God i laikim yumi pastaim. Olsem na em i bin salim Pikinini Man bilong en i kam long graun bilong lusim ol sin bilong yumi. Ol pren, long dispela pasin bilong en God i soim yumi olsem em i laikim yumi tru. Olsem na yumi wan wan i mas laikim tru ol arapela. I no gat wanpela man i bin lukim God. Tasol sapos yumi laikim tru ol arapela, orait God i stap wantaim yumi, na dispela pasin bilong en bilong laikim ol arapela, em i kamap strong pinis insait long laip bilong yumi. Jon 4:7-12.

"God i gat wanpela Pikinini tasol i stap. Tasol, God i laikim tumas olgeta manmeri bilong graun, olsem

Laikim bilong God i no save pinis

na em i givim dispela wanpela Pikinini long ol. Em i mekim olsem bilong olgeta manmeri i bilip long em ol i no ken lus. Nogat. Bai ol i kisim laip i stap gut oltaim oltaim. God i no salim Pikinini bilong en i kam long graun bilong skelim pasin bilong ol manmeri bilong graun olsem jas. Nogat. Em i salim em i kam bilong kisim bek ol." Jon 3:16-17

Jisas wanpela tasol em i rot bilong yumi go bek long God na amamas wantaim laikim bilong em.

Jisas i tok, "Mi tasol mi rot, tok tru na laip. No gat wanpela man bai i go long Papa bilong mi, sapos em i no kisim mi," Jon 14: 6...

"Tru tumas mi tokim yu, sapos man i no kamap nupela gen, em i no inap lukim kingdom bilong God." Jon 3:3

God i laik soim yumi ol tok hait bilong em long yumi ken i go insait long pasin bilong laikim bilong em. Em i antap tru, na i bikpela moa.

"Man i soim laikim bilong em taim em i save kisim ples bilong pren bilong em na i dai long kisim ples bilong em" John 15:13. Jisas i baim yumi bek wantaim blut bilong em yet long diwai kruse bilong kalvari.

Laikim bilong God i kamap ples klia long marimari bilong em long kisim bek manmeri long sin na dai. Tude, yu singaut long nem bilong Bikpela Jisas Kraus taim yu go insait long amamas wantaim em.

Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com



Papua Niugini NESENEL AIDENTITI PROJEK



Oi emu namo totona, Nesinol ID kadi oi abia



**Edukesen/
Sikuli**

▶ Oi emu natuna sikuli lalonai atoa vareai dalana be do ia auka lasi.

▶ Gavamani ese oi emu sikuli davana do ia karaia.

**"Oi rejista hari
bona oi noho lalonai"**

Nesenal Plening Dipatment

ese hereva ia mailaia



Buang Nesenel Ista kem kamap gut

...*Bikpela salens long ol yangpela long senis*

Paulus Tali i raitim

NESENEL Ista Kem bilong ol Buang pikinini bilong Lutheran Sios long kantri i bin kamap long Dogia Kongrigsen long Amele Seket we ol Buang Kristen Felosip bilong Madang Provins i hostim.

Planti yangpela bilong Buang i kamap na ol i kam wantaim ol papamama long sapotim wokabaut bilong ol na tu, long go insait long Baibel Stadi long strongim bilip bilong ol.

Het tok bilong Baibel Stadi em, “Krais na Tumbuna Pasin na Bilip” (John sapta 4 na ves 6 i go 26). Foapela stadimasta i go pas long givim Tok bilong God em, Pasto Dora Yowa, Evanjelis Timoti Yana, Stiven Sagipok na Pasto Matei Ibak.

Ol Stadi masta i serim tok bilong God i sut long Hetok we inap long helpim ol yangpela bilong tude. Pasto Ibak i salensim ol yangpela olsem Krais i stap bikpela long laip bilong husat bai senis tru tru na pas wantaim bikpela Jisas.

Long wankain taim, Pasto Ibak i tok “sapos yu ting olsem yu inap stap insait long Kristen bilip, yu mas save long Tok bilong God o Gutnius bilong Krais husat i bin sevim laip bilong yumi, na brukim daun kain kain pasin no gut. Na i bringim yumi i kam long nupela laip long stap wantaim em, na bihainim lekmak bilong em olsem Kristen tru tru.

Olsem na yumi no ken ting olsem yumi em samting nating long ai bilong God, na arapela, na yusim krangi laip bilong yumi long pasin bilong dispela graun wantaim tumbuna pasin na bilip.

Sapos yumi stap long olupela bel bai yumi lukim olsem yumi stap autsait tru long lukluk bilong arapela Kristen manmeri.

Pasto Ibak i tok moa olsem “sapos yumi bilip long Gutnius, Baibel em i tok bilong God.

Rom sapta 1 ves 16 na 17 i tok, “Tok bilong God yet inap helpim



KRUSIFIKSEN: Pilai drama bilong Krusifiksen we ol 2 Mail yut bilong Lae i ektim. *Poto: Paulus Tali*

wokabaut bilong yumi kamap gut-pela long ai bilong arapela.”

“Bikpela samting yumi mas sanap strong long bilip na soim pasin bilong yumi long ol arapela olsem glaslukluk. Sapos yu ting laip bilong yu i no stret long wanem kain kain pasin yu bin stap long en, pasin bilong sori na brukim skru na prea oltaim i mas stap long kamapim gen Kristen wokabaut bilong nupela laip.”

Pasto Dora Yowa i tok yumi man bilong graun i go insait long ol kain kain pasin na yumi mas luksave na tok sori.

Em i tok yumi mas oltaim kain Baibel em inap sevim laip bilong yumi long bringim tingting i go long God.

Pasto Yowa i tokim ol yangpela olsem nau yupela i kalap kalap na singsing em God i luksave long bel na amamas nau yu soim.

“Kain pasin yu mekim em i olsem tru tru, yu laikim bikpela Jisas. Kain amamas nau yu mekim yu go na mekim moa bai kala bilong laip bipo yu stap long

em i senis na arapela i luksave dispela i kamap tru long Tok bilong God.”

Evanjelis Timoti Yana i bin tokim ol yangpela olsem em i no asua long ol i kamap long dispela kem. “Yumi laik lukim laip, na pasin bilong yumi i mas oltaim stap wantaim Krais Sevia bilong yumi em i bikpela samting.”

Ol yangpela bilong Buang na arapela i stap long kem i bin lukim tru pawa na presens bilong God long Gut Fraide lotu we ol bin werim wait klos na laitim kendol, na soim tru lait bilong Renbo em i sain bilong sios ol sanap long em.

Planti papamama bin lukim kain bikpela nesenel Ista kem na ol i amamas stret, na ol i tok olsem ol pikinini Buang nau bai senis na lusim ausait wokabaut ol i save mekim bipo na stap insait long Kristen bilip.

Ol i tok bikpela tok tenkyu long ol i kam longwe hap olsem long Madang, na kisim stadi we i bin helpim ol.

Long dispela taim, sampela yangpela i bin kam aut na tok sori

long wokabaut bilong ol i no stret, na ol i laik kisim tru Bikpela long laip bilong ol, na kamap gen ol nupela Kristen.

Na Bikpela Jisas inap strongim ol olsem ol bai karim wok lida.

Ol pipol bilong Siar i amamas long kain kem i kamap na bringim luksave bilong ol long strongim wok Gutnius namel long Morobe na Madang bai stap wanpela insait long nem bilong bikpela Jisas.

Kaunsel memba bilong ELC Madang Distrik, Seth John, i tok em i lukim kain wokbung olsem em inap strongim olgeta na no gat bruk i kamap.

Em i tok moa olsem kain wokabaut long kam insait long sios em long kain bikpela nesenel bung bilong yangpela bai blesing bilong Bikpela i kam daun, na ol Kristen inap luksave olsem sios i laik muv.

“Mi makim pipel bilong Siar na Madang Distrik na tok tenkyu long Dogia Kristen long givim graun na Buang Madang Kristen Felosip hostim kem”, Mista John i tok.

Madang rurel helt kisim helpim long Lutheran Sios long Cairns

SAMPELA Sios na rurel helt na edukesen sevis long kantri i save laki long kisim helpim i kam long ol wanlotu bilong ol ovasis.

Olsem na long mun i go pinis, ol helt senta na etpos long ol rurel eria insait long Madang Provins i bin kisim sampela helpim wantaim ol “birth kits” o ol samting long ol dokta na nes i yusim long helpim ol mama taim ol i karim na tu, ol samting long ol mama na bebi i yusim long en i kam long ol Lutheran Sios memba i stap long Cairns, Australia.

Helpim i bin kam long ol meri kongrigesen memba bilong Trinity Lutheran Sios long Cairns aninit long stia o go pas bilong Rita Fenske, em meri bilong Art Fenske, man husat i bin statim Lutheran Siping bihain long Wol Woa 2 long Madang.

Long planti yia, Trinity Lutheran Sios long Cairns aninit long go pas bilong Misis (Sista) Fenske i wok saplaim ol “birth kit” i go long Lutheran Helt Sevis long Madang.



(Hankais i go long hansut) i soim Sussie Diphen (Staff), Elizah Gatana (Sumatin), Vincensia Mission Sumatin) na Esther Suiambau (Staff) wantaim ol betkits i gat long en sampela kaikai tu. *Poto: Sibina Mairi, MTS,*



LIKLIK MERI NA DOKTA

INSAIT long wanpela Holi Spirit Semina ol i wokim bipo long de bilong Pentekos, wanpela dokta i bin wokim testimoni bilong em.

“**Mi wanpela dokta. Bipo mi no gat bilip long God. Mi no save go lotu o prea wantaim narapela manmeri. Mi wok long wanpela bikpela haus sik. Wanpela taim ol i askim mi long operetim wanpela liklik meri, I gat 5-pela krismas. Em i gat bikpela sik, narapela dokta mi i tok olsem – I gat 10% tasol - long sevim laip bilong dispela liklik meri”.**

Pastaim dokta i tok no gat save long wokim operesen. Bikos em bai westim taim tasol. Liklik meri bai dai namel long operesen o bihain long operesen.

Tasol famili i askim em gen na gen olsem na em i askim papa mama long sainim pepa bilong tok orait long wokim operesen na wet long wanem samting bai kamap long pikinini bilong ol, sapos operesen bai no gat karim kaikai o sapos pikinini bilong ol i dai.

De bilong operesen i kamap. Ol i bringim liklik meri i go insait long Operesen Tiata (OT).

Ol nes na dokta i bisi long redim olgeta samting bilong operesen. Bipo long nes i givim sut bilong anestesises o bai putim em long slip long liklik meri, wantu tasol liklik meri i askim dokta: “**Dokta, inap mi askim wanpela samting?**”

Dokta i bekim: “Yes, darling. Wanem samting yu laik askim?”

Liklik meri i tok: “**Olgeta nait bipo mi go slip, mi save wokim prea. Inap yu larim mi wokim prea bipo mi kisim sut bilong anastesis long mekim mi slip na yu ken operetim mi?**”

Dokta i tok: “**Ya, darling! Yu ken wokim prea nau. No ken lus tingting prea long mi tu a?**

Liklik meri i pasim ai, pasim tupela han bilong em na stat long wokim prea bilong em. “**Lord, God! Yu papa bilong marimari. Yu save laikim mipela. Blesim mi insait long tudak bilong dispela nait. Sambai long mi oltaim, na stap klostu long mi. Lukautim na protektim mi inap long san kamap tumora. Mi askim yu long blesim tu dokta husat bai operetim mi nau na blesim olgeta nes i helpim em, Amen”.**

Taim em i pinisim prea, em i opim ai na tokim dokta olsem: “**Tenkyu dokta long givim mi taim long prea. Nau mi redi pinis Dokta”.**

Dokta i sanap olsem wanpela maus pas man na ai wara bilong em i pundaun nating nating. Em i no inap mekim wanpela toktok. Em i amazim long strongpela bilip bilong liklik meri.

“**Long dispela nait**”, dokta i tok; “**Bipo mi wokim operesen, maski mi nogat bilip yet long God, wantu tasol mi wokim wanpela prea olsem, ‘God, yu gutpela papa tru. Sapos long narapela operesen yu no bin helpim mi, tasol tunait mi askim yu long helpim mi...sevim dispela liklik meri’.**

Bihain long wokim prea, mi stat long operetim liklik meri. Operesen bilong mi i kamap gutpela tru”.

Liklik meri i kamap orait gen. Taim em i lusim haus sik na go bek long haus bilong em, dokta i tok: “Nau mi luksave. Tru tumas. MI YET I SIKMAN i bin go long operesen bilong bilip bilong mi”.

Laip na bilip bilong liklik meri i givim bikpela skul long yumi – sapos yumi ofaim olgeta hevi na wari i go long God, em i bai mekim yumi kamap orait na helpim yumi

Prea bilong yumi i mekim yumi luksave olsem Go i save lukautim na bekim wanem samting yumi askim.

Prea laip bilong yumi i mekim bilip bilong yumi i kamap strong na kamap laip olgeta de.

Mariwana bisnis i kamapim bikpela hevi tru long PNG



Olgeta kantri long wol i gat ol lo bilong ol i stap. Husat man-meri o pikinini i brukim lo bal i mas gat mekim save. Em i klia na yumi olgeta i luksave long en. Las wik i bin gat strongpela toktok i kamap long 17 man bilong Papua Niugini husat i stap long kalabus nau long Papua Provins long Indonesia bikos ol i brukim lo bilong Indonesia. Planti bilong ol dispela lain i karim mariwana i go long salim na ol Indonesia i holim ol na putim long kalabus.

Praim Minista Peter O'Neill na Foren Minista bilong kantri Rim-bunk Pato i bin mekim strongpela tok lukaut i go long ol pipel bilong yumi long pasin bilong karim drag i go traim salim long narapela kantri. Husat i mekim dispela pasin i brukim lo na em i wari bilong em sapos ol i kalabusim em.

PNG i bin pret long taim Indonesia i kilim ol pipel husat i bin kalabus long pasin bilong karim drag.

Lo bilong Indonesia i tok husat man o meri i karim drag bai i mas dai. Na tupela man Australia i bin stap insait long grup gavman bilong Indonesia i kilim indai las wik.

Australia i bin traim kain kain rot bilong stopim Indonesia long kilim indai tupela sitisen bilong en tasol Indonesia i no senisim tingting. Em i tok ol i brukim lo, orait ol i mas kisim mekim save bilong ol – dispela mekim save em long sutim ol i dai.

Papua Niugini i gat bikpela



bisnis bilong salim mariwana. Dispela i wanpela hait bisnis, tasol ol lain bilong salim i gat ol kastoma bilong ol. Olgeta provins i gat hevi bilong mariwana. Ol yangpela man na meri tu i smokim na het bilong ol i paul nabaut. Ol pipel long ol

longwe ples i hait na groim na salim long lukautim sindaun bilong famili. Yumi harim stori bilong ol lain i salim na kisim mani o ol samting bilong pait olsem ol gan. I gat bikpela mani long dispela hait bisnis olsem na i hatwok tru long stopim.

Planti pait na hevi i wok long kamap long komyuniti bikos ol pipel i dring spak na smokim mariwana tu. Olgeta wik long kot, i gat ol dispela kain keis i save kamap long ai bilong mejistret. I tru ol kot i save givim bikpela panismen tasol dispela

hevi i stap yet bikos em i wanpela rot bilong kisim mani.

Ol kain ples we i no gat gutpela rot bilong ol pipel i painim mani, i mekim ol yangpela i pundaun long dispela rot bilong kisim bikpela mani hariap.

Ol i no wari long lo bikos lo long PNG i no save givim bikpela mekim save tumas long ol.

Mekim olsem na nau sampela man i traim karim i go salim long Indonesia. Ating ol i no klia long lo bilong Indonesia long kilim indai ol lain i karim drag o? Lo bilong kilim indai man em i strongpela lo, tasol bai i no inap long stopim ol trabelman i kamapim wankain hevi long bihain taim.

Hia long PNG, i gat ol sios grup na ol NGO long ol provins i mekim wok bilong helpim ol komyuniti i yusim graun na save bilong ol long helpim sindaun bilong ol. Ol i klia long wanem hap o husat lain i save mekim dispela hait bisnis bilong salim drag. Yumi mas luksave long wok bilong ol na strongim wantaim sampela mani na ol gutpela wokman na meri long kamapim senis long ol ples.

I gat planti yangpela man na meri husat i krai long kisim kain helpim olsem na bai ol i lusim dispela pasin bilong mekim isi mani long mariwana. Yumi mas opim ai na luksave long bikpela hevi mariwana i kamapim long PNG tude na kamapim ol program bilong daunim dispela hevi. Yumi mas stopim nau na long bihain taim bai ol pinikinini bilong yumi i ken stap gut.

Ol i givim eksebisen long makim ANZAC De

LONG makim Anzac komemoresen, gavman bilong Australia na Kwinslan i givim wanpela eksebisen, *Defending the Pacific*, long Rabaul Musium.

Dispel eksebisen i bin kamap taim Kwinslan gavman i selebretim Anzac Senteneri long wankain taim wantaim Musium bilong Kwinslan.

Lutinen Kenel bilong Australia Difens Fos, Ian Ford, i givim dispela eksebisen long Seketeri bilong Rabaul Historikel Sosaiti, Susie McGrade long Epril 25 long Rabaul.

Dispela eksebisen i makim stori bilong ol volantia long Not na Fa Not Kwinslan husat i bin joinim Australia Naval na Militeri Ekspedisineri Fos long stat bilong Wol Woa 1.

Long Septemba 14, long 1914 ol soldia long Fos i bin len long Rabaul long painim na bagarapim ol redio stesen bilong Jeman. Wanpela patrol bilong 25 Australia soldia i bungim ol Jeman risev na ol Niugini polis long Bitu Paka. Olsem 6-pela Australia, wanpela Jeman na 30 Niugini i bin dai long hap. Ol Australia husat i bin dai long hap i bin namba wan grup bilong 60,000 Australia long dai long Great War.

Kepten Andrew Craig RAN, Siaman bilong Kwinslan Edvaiseri Komiti bilong



Lutinen Kenel bilong Australia Difens Fos, Ian Ford, i givim dispela eksebisen long Seketeri bilong Rabaul Historikel Sosaiti, Susie McGrade.

Komemoresen bilong Anzac Senteneri i tok dispela iven i bin wanpela bikpela de long histori bilong Australia.

“Taim Wol Wo wan i bin stat na go bikpela, ol Australia i bin harim dispela nius wantaim amamas bikos long namba wan taim ol i bin bung olsem wanpela indipenden kantri long wol,” Kepten Craig i tok.

Em i tok, “Mia mamas long lukim dispela eksebisen i go aut long Rabaul, long wanem dispela em wanpela bilong ol projek i stap long plen bilong Kwinslan long makim sekrifais na strong bilong ol tumbuna husat i bin sevim Australia long 1914 inap 1918.”

Dispela 5-pela bena bilong eksebisen i soim ol seleksen bilong ol sotpela muvi o piksa, ol piksa, ol akaiv na ol sotpela nius long niuspepa long 1914. Dispela ol eksebisen i save stap long 12-pela hap long Not na Fa Not Kwinslan.

Long wankain taim, gavman bilong Kwinslan i givim \$49.3 milien long selebretim Anzac Senteneri long 2104 inap 2018. *Defending the Pacific*, em i bikpela samting long gavman bilong Kwinslan long selebretim Anzac Senteneri.



Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela via. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Ol polis i redi long Bogenvil Ileksen

EKTING Polis Komisina long Bogenvil, Paul Kamuai, i tok Polis long Atonomas Rijon bilong Bogenvil i redi pinis long lukim olsem ol ilekean bai kamap long rijon stat long Me 11 i fri, fea na seif.

Ekting Polis Komisina, Paul Kamuai, i tok ol i bin lonsim pinis Bogenvil Polis Sevis Ileksen Operesen tupela Fraide i go pinis long lukautim sait bi long sekyuriti long taim bilong ileksen.

Em i tok ol polis i bin go het long wok tu wantaim Ilektoel Komisin long karim aut ol awenes kampen long olgeta komyuniti long Bogenvil.

Mista Kamuai i tok ol polis ileksen sekyuriti awenes kampen i wok long go het tu long hap bilong Konnou long Saut Bogenvil we ol Me'ekamui lain i bin stopim ol kendidet long karimaut wok kempen bilong ol.

Em i tok ol komyuniti lida long Konnou tu i singautim ol kendidet bilong Atonomas Bogenvil Gavman ileksen long go kempen long hap bilong ol.

Tasol Ekting Polis Komisina Kamuai i tok olgeta wok redi long sait long ileksen sekyuriti i go het gut.

Wari long PNG boda long det penelti lo bilong Indonesia

PAPUA New Guinea gavman i mas stretim ol boda pos bilong en wantaim Indonesia long stopim ol pipel i bringim ol hait drag i go long Indonesia we ol inap dai olsem tupela sitisen bilong Australia we ol i bin kilim ol long las wik.

Dorothy Tekwie, lida meri long Wes Sepik i wokim dispela toktok bihain long ol ripot olsem wanpela ten seven (17) pipel bilong PNG I stap nau long kalabus long Jayapura long wanem, ol i bin karim hait ol drag igo long Indonesia.

Toktok bilong en i bihainim tu wari long ol famili bilong ol dispela kalabusman long Jayapura olsem Indonesia inap kilim ol dispela famili memba bilong ol.

Australia i bin mekim ol bikpela toktok na askim Indonesia long n oken kilim Andrew Chan na Myuran Sukumaran husat i bin bringim ol hait drag sampela yia i go pinis, tasol Indonesia i no bin harim askim bilong Australia na i kilim pinis tupela man.

Edukesen i bikpela samting long laip

Michael Novingu i raitim

Edukesen em i bikpela samting bai kirapim gutpela sindaun long famili, komyuniti na kantri wantaim.

Joe Meava em Eksekutyutiv Opisa bilong Malakai Tabar, em memba bilong Gesel na Minista bilong Haia Edukesen Saens na Teknoloji i makim maus bilong memba na i mekim dispela toktok bihain long em i givim K\$400.00 long sponsaim ol sumatin bilong Gesel Distrik i skul long Intanesenel Trening Institut (ITI) Rabaul.

Mista Meava i tok Edukesen em i bikpela samting long laip bilong yumi.

Em i tok em i amamas long givim helpim na makim maus bilong Mista Tabar long helpim ol sumatin long ol skul fi bilong ol.

Em i tokim ol sumatin olsem save ol i kisim i mas no ken larim i stap wantaim ol.

Em i tok yumi mas yusim long mekim wok long apim ikonomi bilong Is Nu Briten na kantri wantaim.

Gesel Distrik i helpim sponsaim ol sumatin bilong distrik i go skul long ITI Mosbi, Kimbe, Lae na nau long Rabaul, Meava i tok.

Em i tokim ol sumatin long wok hat na pinisim gut ol skul bilong ol, no ken wokim pasin no gut bai ol i lusim skul na sindaun bilong yu bai bagarap long komyuniti bilong yu.

Meava i tokim ol sumatin bilong Gesel Distrik olsem distrik bai helpim long peim ol skul fi bilong ol long 2016 na ol krismas i kam.

Long wankain taim, bosman bilong ITI long Rabaul, Michael Novingu, I,tok tenkyu long Mista Tabar long helpim peim ol skul fi bilong ol sumatin bilong em long ITI Rabaul.

Novingu i tok bai wok bung wantaim Gesel Distrik long lukim ol sumatin i pinisim ol skul bilong ol, na kisim wok long helpim sindaun bilong ol long bihain taim.

Wanpela PNG atis i helpim ol tarangu lain long Australia

DISPELA em i stori blong wanpela atis bilong PNG husat i save peint na I helpim sampela homeless o tarangu lain long wanpela hap bilong Melbourne long Australia.

Naup Waup, em i atis blong Morobe provins long PNG i save helpim ol tarangu pipel we ol i gat sik long het na ol i save raun raun nating long ol strit.

Naup Waup i kam long Morobe provins na em i wanpela saveman long wokim peinting, mekim ol samting long han na holim ol eekshibisen o so we planti pipel i save go lukim.

Naup i save skulim ol dispela Homeless pipel long we bilong Art aninit long wanpela progrem ol i kolim long "Cohealth Arts long Footscray".

Em i tok sampela long ol dispela pipel em ol bilong Africa husat kam long ol kantri we ol bikpela pait i save kamap long ol olsem long Sudan we ol i save fosim ol pikinini long kamap olsem ol child o pikinini soldia.

Mathew Yakai i raitim

LONG Epril 04, 2015, Borkent famili I gat long en, Kelly famili na Papa Markam famili na ol nara-pela bilong Usino Ples long Usino-Bundi distrik i bin ran long bikpela Ramu Riva, stat long Wara Tul long Yamagi i go long Mulsingab o Tais Wara long Usino. Dispela wokabaut ol i bin mekim long Ista Wiken em long witnesim wanpela kastom "brukim bet" sere-moni we ol i larim yangpela meri, Kups i go long nupela man bilong em.

Dispela ran long kanu i bin pulap tru wantaim moa long 40 pipel long en. Bikpela bilong kanu em 20 mita longpela na 40 hospawa.

Man i holim stia long dispela taim em Jonathan na boskru Paul. Tupelal i save man stret long ran long bikpela Wara Ramu na ol i save go olsem long Aiyom i go daun olgeta we i no gat rot tru.

Poto Mathew Yakai



Bihainim Wara Ramu...

Nupela dentis sia bilong PMGH

Frieda Sila Kana i raitim

POT Mosbi Jeneral Haus sik dentis klinik nau i gat 10-pela moa nupela na gutpela sia bilong ol dentis i ken sekim na stretim tit bilong ol sikman meri na tu long wokim ol operesen.

Gavman bilong Papua Niugini i bin lusim K4.6 milien long baim ol gutpela ikwipmen bilong stretim tit na ol haus sik i kisim pinis.

Long mun Mas dispela yia, City Pharmacy Limited (CPL) i bin bringim 5-pela bilong ol dispela sia pinis. Long 20 Mas Nesenel Dipatmen bilong Helt wantaim Pot Mosbi Jeneral Haus sik na Yunivesiti bilong Papua Niugini Dentis Skul i bin lukim 5-pela nupela sia i go insait long skul bilong dentis kempas.

Siaman bilong CPL, Mahesh Patel i bin amamas tru long lukim dispela ol gutpela dentis sia i go insait long dentis klinik bikos em i tok, long 26 yia CPL i save givim marasin saplai long helt dipatmen tasol sampela yia nau ol i helpim long ol ikwipmen. Ol i bin stat wantaim Sandaun provinsal haus sik na Pot Mosbi Jeneral Haus sik bi-hain.

Seketeri bilong Dipatmen ov Helt, Pascoe Kase i tok insait long tripela o foapela yia gavman i wok long helpim Pot Mosbi Jeneral Haus sik long kamapim gutpela ikwipmen na ol haus bilong marasin. Long dispela taim, ol wokman bilong haus sik i bin rausim pinis olpela ikwipmen long givim spes bilong ol nupela ikwipmen.

Em i tok tenkyu long CPL long baim na bringim ol dispela dentis ikwipmen long taim stret. Mista Kase i tok, las yia i bin gat bikipela hevi long dentis klinik we ol siklain i no bin inap long kisim helpim bilong wanem ol dokta i no gat gut-

pela ikwipmen. Tasol nau em i kamap.

"Yu ken kam na klinim tit bilong yu na stretim tit, taim ol dispela sia i redi long wok," Mista Kase i tok.

Em i laikim ol nius lain long tok save long ol Papua Niugini man-meri long kam long sekim tit bilong ol. Long wankain taim tu Mista Kase i givim salens long ol wokman meri bilong helt dipatmen long lukautim gut ol dispela ikwipmen na stretim taim ol i bagarap. Em bai lukim gavman i no ken baim yet nupela samting olgeta taim, na mani em i ken yusim long mekim ol narapela bikipela wok.

Mista Kase i tok moa olsem, wantaim nupela ikwipmen, em i laikim ol wokman na meri i mas kamap long wok long taim bilong wok na sevim ol siklain.

Long wankain taim, Dean bilong Medikal Fekalti long Yunivesit bilong Papua Niugini, Profesa Nakapi Tefuarani, i tok, ol sia bilong dentis i bin dai planti yia i go pinis tasol nau ol i kirapim gen. Em i tok moa olsem ples bilong skulim ol sumatin dentis i stap tasol i no gat ol ikwipmen long soim ol long wok. Em i tok tenkyu long gavman i givim mani na CPL long baim na givim dispela sevis.

Dispela em i namba wan wok bung bilong Pot Mosbi Jeneral Haus sik wantaim Skul bilong Saiens na Marasin, bihain long ol i sainim wanpela Memorandum bilong Agrimen (MOA). Dispela agrimen em bilong ol dokta bilong PMGH long wok wantaim Skul bilong Marasin long mekim wok bilong klinik na long trenim ol anda greduet na pos greduet dentis sumatin dokta.

"Mipela bilip bai mipela kisim 10-pela moa sia bilong denis, 5-pela em i no inap," Profesa Tefuarani i tok.



Nupela Dentis sia bilong Pot Mosbi Jeneral haus sik i stap long UPNG Medikal Fekalti skul bilong dentis.

Dokta Apaio, Sif Sentis long Dipatmen bilong Helt i tok, em i amamas tru long lukim dispela samting i kamap bikos wok bilong dentis i no bin save kisim bikipela luksave insait long kantri. Dentis em i save givim kwaliti long laip.

"Wok bilong dentis em i save lukluk long stretim pes na tit we em i bikipela samting long laip. Tasol nau i gat 6-7 dentis i go long 10-pela long kantri," em i tok.

Maus na bikipela sejeri long pes em i bikipela hevi long kantri. Planti bagarap i save kamap long maus na pes bikos long pasin bilong kaikai buai tumas. Em i hap pasin bilong kalsa tasol ol pipel i mekim i go long narapela mak olgeta we i

bagarapim bodi na sindaun bilong ol.

"Nau em i nupela taim bilong wok dentis, na dispela em i stat tasol na mipela bai go long olgeta hap bilong kantri," Dokta Apaio i tok.

Ol dispela denis sia i narapela kain olgeta long ol sia i bin stap pastaim long haus sik. Em i save wok wantaim wanpela liklik laip we i save pilim tasol han bilong dokta na em i save mekim wok. Em i ken mekim wara i ron long klinim tit long em yet.

Insait long dispela sia ol dokta inap long wokim ol liklik operesen long maus na tit.

Dokta Elenise Falealunga, husat i go pas long lukautim ol dispela

nupela dentis sia i tok, ol siklain i save wet longpela taim long lukim dokta bikos dokta i save nidim wan hap aua long mekim wok bilong wanpela sikman o meri.

Dipatmen bilong helt i bin baim ol ikwipmen bilong dentis klinik long givim long 18 provinsal haus sik na CPL bai mekim ol dispela wok bilong baim na bringim.

Kontrak wantaim CPL i karamapim wok bilong baim na putim ol sia na tu long givim trening long yusim ol ikwipmen na long we bilong lukautim na stretim.

Projek em bai pinis na redi long olgeta 18 haus sik long pinis bilong mun Jun 2015.

PNG Ports helpim liklik bebi long go haus sik long ovasis

Jossie Nick i bon long Me 8 las yia na i stap 11-pela mun. Em i no stap nomol olsem ol arapela pikinini. Wanpela solap i kamap klostu long nus na ai na em i go bikipela moa na i givim wari long papa na mama.

Papa Nick Kuman na Jossie i wari olgeta taim olsem namba wan pikinini bilong tupela i gat bikipela hevi.

Tupela i laikim pikinini bai stap gut tasol dispela sulap i kamap bikipela moa na i no gat ol haus sik samting bilong stretim dispela sik long kantri na i gat nid long tupela bai kisim bebi go long haus sik long Filipins haus sik.

Liklik Jossie bai stap nomol sapos em i go kisim tritmen long Filipins sapos tupela papamama bilongng em i gat K150, 000.

Dispela hevi bai kamap isi sapos ol lain i gat bel sori i helpim tupela long mani long kamap long K150, 000 mak.

Long las wik PNG Ports i givim K5,000 long Mista Nick

Kuman na meri bilong em Jossie.

Papa bilong liklik Jossie em polisman na wok long Hagen. Em i kam long Pot Mosbi long traim long mekim sampela fan raising long kisim pikinini bilong em i go long haus sik.

Sulap long pes i wok long go bikipela na i gat nid long liklik Jossie i mas kwik taim go long haus sik long Filipins long dokta bai stretim.

Papa Nick Kuman i tok tenk yu long PNG Ports long helpim na i tok dispela em bikipela samting long laip bilong em na family bilong em na em bai no inap lus tingting taim Koporet Komyunikesen Menesa Peter Korugl i makim CEO, Stanley Alphonse na givim K5,000 sek.

Mista Krugl i tok PNG Ports i promotim helt long wokples na long komyuniti na helpim long ol medikol sait em wanpela helpim kampani i helpim aninit long PNGCPL komyuniti program.



Liklik Jossie wantaim papa Nick Kuman na mama bilong em i kisim K5, 000 sek long Peter Korugl bilong PNG Ports.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Ol sumatin bilong Solomons Ailans i tok nogat long ol MP i no ken baim takis.

Ol Tektonik Plet i surik na kamapim guria long PNG

Wanpela PNG Saintis i tok ol plet aninit tru long ol solwara na graun i save surik na bamim wanpela narapela i kamapim ol bikipela guria long PNG na Nepal.

Guria i bin kamap long Is Nu Briten provins long Tunde Me 6.

ABC nius i bin toktok wantaim Mathew Moihoi wanpela save-man bilong seismoloji long Dipatman bilong Mineral polisi na jeohasad long Mosbi.

Tupela bikipela guria i bin kamap long Is Nu Briten long Fonde na Fraide long wik i go pinis na planti ol narapela liklik guria i wok long kamap yet na mekim ol pipel i wari nogut volkeno bai pairap.

Tasol Mista Moihoi i tok ol tektonik plet aninit tru long solwara na insait tru long graun i save muv na bamim ol narapela plet na kamapim guria, wankain olsem guria em i bin kamap long kantri Nepal long tupela wik i go pinis.

Moa long 7 tausen pipel i bin dai long dispela guria long Nepal.

Nepal em i wanpela kantri em i stap antap tru long ol bikipela maunten long Esia klostu long Maun Everest, bikipela maunten tru long wol.

Mista Moihoi i tok olsem planti pipel i dai long hap long wanem ol haus i bin bruk na pudaun antap long ol.

Australia i mas soim rispek long lo bilong ol arapela kantri

Ol wan wan kantri i mas luk-save na soim rispek long lo bilong ol narapela kantri maski sapos sampela lo em i bilong kilim dai ol

pipel, olsem pasin Indonesia i mekim las wik long kilim tupela drag smagla bilong Australia.

Atoni Jenerel bipo bilong Papua Niugini, Kerenga Kua i toktok wantaim ABC long dispela samt-ing. Mista Kua i bin wok wantaim gavman long kirapim tingting bilong det penalti long kantri.

Mista Kua i tok PNG i save Australia i no laik long det penalti, tasol em i tok Australia i mas luk-save tu long ol lo bilong ol narapela kantri.

Em i mekim dispela toktok bihain long gavman bilong Indonesia i bin sutim dai Andrew Chan na Myuran Sukumaran long bik moning long las wik Trinde.

Mista Kua i tok tu olsem PNG i gat ol bikipela hevi tru long lo na oda na gavman i gat rait long painim wanem kain lo long daunim dispela, na ol i ting det penalti em i wanpela gutpela wei long daunim wari bilong lo na oda.

Jastis sistim bilong Indonesia i bin kilim dai pinis tupela drag smagla bilong Australia, Andrew Chan na Myuran Sukumaran.

Ol i bin sutim dai Chan 31, na Sukumaran, 34 long Nusakambangan ailan long las wik wantaim sikispela arapela kalabus.

Myuran Sukumaran na Andrew Chan tupela i hap bilong wanpela grup ol i kolim Bali 9.

Dispel i grup bilong 9-pela pipel Indonesia i bin arestim long Bali long Epril 17, 2005 long haitim drag na i laik karim i go aut long kantri.

Ol i bin haitim moa long 8 kilogram heroin na traim long kisim i go long Australia.

Foapela long ol, em ol i arestim long Denpasar ples balus wantaim ol paket heroin ol i pasim raun long bodi bilong ol. Tripela long ol, em ol i bin arestim long Maslati Hotel wantaim 300 gram bilong heroin.

Andrew Chan na Myuran Sukumaran em ol i bin arestim long Denpasar ples balus.

Long 22 Ogas 2005, ol Australian Federal Polis i tok klia olsem i bin givim infomesen long ol Indonesian polis long arestim ol dispela lain - maski ol i save i gat det penalti long Indonesia long hait na karim ol drag.

Namel long Oktoba 11 na Oktoba 14 long 2005, keis bilong olgeta Bali 9 grup i kamap long kot. Long Februeri 13, 2006 tupela Bali 9, Renae Lawrence na Scott Rush, Denpasar distrik kot i kalabusim tupela long laip.

Long Februeri 14, 2006 Denpasar distrik kot i painim Andrew Chan na Myuran Sukumaran i guilti long drag trekfiking, na tupela bai dai.

Kot i lukim olsem tupela i bos bilong ol drag smagla na i givim ol mani, baim tiket bilong na hotel bilong ol.

Kot i salim tu Michael Czujaj na Martin Stephens i go kalabus long laip.

Long Februeri 15, 2006 kot i painim Matthew Norman, Si Yi Chen na Tan Duc Thanh Nguyen gilti na kalabusim ol long laip.

Long Septemba 2006, kot i rausim apil egensim det sentens bilong Andrew Chan na Myuran Sukumaran. Praim Minista bilong Australia long dispela taim, John Howard i tok em i no laik subim nus i go insait long taim keis bilong ol i stap long han bilong kot.

Tasol long Julai 27, 2007 John Howard i bin toktok wantaim Presiden bilong Indonesia Susilo Bambang Yudhoyono, na tokim em olsem Australia i gat bikipela intres long keis bilong ol Bali 9.

Long Ogas 13, 2010 Andrew Chan na Myuran Sukumaran i putim askim bilong ol long kot long judisal riviu.

Tupela i tok tupela i sori long

rong bilong tupela na i askim long gavman bilong Indonesia i marimari na fogivim ol.

Long Me 11, 2011 Indonesia suprim kot, i daunim det sentens bilong Scott Rush wanpela long ol Bali - 9 i kam daun long laip kalabus.

Long Jun/Julai 2011, Suprim Kot i rul olsem i no gat wanpela samt-ing i rong long det penalti bilong Chan na Sukumaran, na tupela i mas dai long fairing skad.

Insait long 2012, Andrew Chan na Myuran Sukumaran i bin askim marimari long Presiden bilong Indonesia.

Stat long Janueri dispela yia i kam inap long las wik, gavman bilong Australia na tu Praim Minista Tony Abbott na Foren Minista Julie Bishop, i bin traim long stopim eksekusen bilong tupela man ya.

Olgeta legal wok bilong ol loya bilong Chan na Sukumaran long stopim eksekusen i lus nating.

Narapela meri bilong Phillippines Mary Jane Veloso, ol i givim last minit marimari na ol i no kilim.

Tupela nait pastaim long ol i kilim dai. Chan i bin maritim gel-pren bilong em Febyanti Herewila long wanpela seremoni insait long haus kalabus.

Long ol las de bilong em, Sukumaran i bin pentim wanpela piksa em i kolim, *The second last day na One Heart, One Feeling in Love*.

Olgeta 9-pela kalabus wantaim tupela bilong Australia i sainim ol dispela penting.

Bodi bilong tupela Myuran Sukumaran na Andrew Chan, em ol i kisim kam bek long Australia.

ANZAC 100 Aniveseri bilong paik long Gallipoli

Ol pipel bilong Australia na Nu Silan i makim bikipela de tru long histori bilong tupela long Wol Woa 1 long tingim ol soldia bilong ol husat i bin dai long Galipolli long kantri Turkey. Epril 25 em i ANZAC De.

Epril 25 long dispela yia, 2015, em i bikipela de tru bilong ol pipel bilong Australia na Nu Silan bikos em i makim 100 yia ol soldia bilong dispela tupela kantri i bin kamap long Gallipoli long Turkey long Wol Woa 1.

Ol pipel bilong Turkey tu i bung wantaim planti tausen pipel bilong dispela tupela kantri long makim dispela de.

Sampela i save tok olsem dispela paik long Gallipoli i bin mekim Australia na Nu Silan i kamap olsem ol i independen kantri na i no stap aninit moa long Great Britain.

Olsem na las wik Sarere Epril 25, i bin lukim planti tausen pipel tru i bung long Gallipoli Peninsular long harim na stap long bikipela lotu na bung bilong tingim ol soldia husat i bin dai

long dispela paik.

Long Pasifik tu, bai ol i makim dispela 100 yia anivesari, olsem long Rabaul long Is Nu Briten provins we ol i tok stat bilong Wol Woa i bin kamap long Rabaul long 1914 taim ol namba wan Australian pipel i bin dai bihain long ol soldia bilong Jemani i bin kilim ol long Bitapaka. Na long yia i go pinis, ol i bin makim 100 yia bilong dispela Wol Woa 1.

Long las Sarere tu, ol pipel bilong Rabaul i bin makim tu dispela 100 yia long Gallipoli.

Praim Minista bilong Australia, Tony Abbott, Oposisen lida Bill Shorten, ol arapela lida na planti pipel i bin stap long dispela bikipela seremoni long Gallipoli.

Wanpela pikinini man bilong wanpela soldia husat i bin pait long Gallipoli i tok ol i no ken lus tingting long dispela woa long wanem, em i hap long stori bilong Australia.

Stat bilong Wol Woa 1 bilong ol pipel bilong Australia na Nu Silan i bin stat long 2014 long Rabaul long PNG, na Susie McGrade bilong Rabaul Historikel Sosaiti i tok ol i makim tu dispela 100 yia long Gallipoli, maski sapos 100 yia bilong ol i bin kamap long 2014.

Ol memba bilong Solomons Palamen bai no ken baim takis

Palamenter Entaitelmen Komisin (PEC) bilong Solomon Ailan i mekim disisen pinis long ol memba bilong palamen bai i no ken baim takis.

ABC nius i bin toktok wantaim Johnson Siapu, Siman bilong Solomon Ailan Palamenter Entaitelmen Komisin na Daniel Fenua, Eksekutiv Opisa bilong Transparensi Solomon Ailan.

Johnson Siapu i tok ol i memba i no ken baim takis long wanem ol memba i wokim bikipela wok na pe bilong ol i liklik tumas.

Mista Siapu i tok dispela disisen em i stret aninit long lo we i karamapim wok bilong Palamenter Entaitelmen Komisin.

Em i tok ol husat lain i no wanbel long dispela disisen ol i ken givim tingting bilong ol i go long Komisin.



Tasol Transparensi Solomon Ailan i tok disisen long ol memba bilong palamen i no ken baim takis long gavman, em i no stret.

Eksekutiv Opisa bilong TSI, Daniel Fenua i tok em i no stret taim olgeta wokman na meri long kantri i baim takis, na ol memba i no baim takis.

Em i tok risen ol i givim long pe bilong ol memba i no bikipela em i no gutpela risen - long wanem pe bilong ol woka long kantri i liklik moa long ol pe bilong ol memba.

Em nau! Ol pikinini i ken painim rot
i go long ples wantaim Wantok kru...

Sudoku



EM ORAIT

EM NOGUT

Ol wod lista hia:

- AISKRIM

APINUN

BAKSAIT

BARET

DRIPMAN

EMTRIPLELA

FRAN

GLAMAN

GLASIM

HALLANS

HAMBAKMAN

HANGRE

ISTA

KABURETA

KAKAO
- LANG

LETIS

LIMBUM

MAKAO

MAMA

MARIMARI

NAMBATEN

OLPELA

OLTAIM

PAINIMAUTIM

E V Z O E R I E E K P A E Z A G F W V A
P D E X R F X W E D N I B D E F F S L Z
E A I S K R I M E A H A M B A K M A N T
Y Q A U N N M T R W E P M L D T T M D W
E L H T A U G F E K R U E B E I T S X N
A K E O G M E T H F P P Q A A S I I A N
F E A I K T S G O V I A N E T T O L S F
F W N B P M G A L R N I P M E A E R M N
P A O B U H N O T P X N N L L P O N D E
I I P M A R I M A R I I E T L S D N N N
H D G I S R E K I H L M E O O F P S E E
M D L B N R E T M A D A I S U D C E U K
I D A J G U R T A L B U N C E M H A D P
N G M N U M N H S L S T T G S O A H E T
I D A G L A S I M A I I S X C P I S T W
P H N D R I P M A N A M W E E R N M K P
Q K H S O S M A G S M G B N I C E L L X
T M W V H F M A K A O G M U P I A Y C G
I E K A K A O A M S G I T E M F L S C P
E L R C M P B X F M Q A A I A I C M L F

		3	8			5		
	5		2				7	9
	9				3			4
			4	2		9		
6	2						5	1
		9		1	7			
4			5				9	
8	7				2		4	
		5			6	2		

4				2				9
	2				9			6
	8		1			4		7
		8		3	7			
	6	5				7	3	
			5	8		6		
1		2			8		6	
8			4				7	
5				7				3


Ansa bilong Sudoku # 99 na # 100 neks isu

2	6	4	3	8	5	9	1	7
5	7	8	9	1	2	3	6	4
3	1	9	6	7	4	2	8	5
7	5	3	4	2	6	8	9	1
4	9	6	1	5	8	7	2	3
1	8	2	7	3	9	5	4	6
8	2	1	5	4	3	6	7	9
9	4	5	2	6	7	1	3	8
6	3	7	8	9	1	4	5	2

6	8	9	1	3	4	2	5	7
2	1	5	6	7	8	4	9	3
7	4	3	2	9	5	1	6	8
9	2	1	5	4	3	7	8	6
8	3	6	9	1	7	5	2	4
5	7	4	8	6	2	9	3	1
1	9	8	7	2	6	3	4	5
3	6	2	4	5	1	8	7	9
4	5	7	3	8	9	6	1	2

Ansa bilong las wik Sudoku # 97 na # 98

Ansa bilong Wod Pilai isu 2120



Rifom bai helpim praivet sekta long PNG i gro: ADB

Stanley Nondol I raitim

PNG em i no isi ples long wok bisnis na groim ikonomi bikos envairomen bilong wok bisnis i gat planti salens olsem na gavman na praivet sekta i mas wok bung olgeta taim long mekim isi long praivet sekta i ken groim

ikonomi bilong kantri.

PNG i gat ol bikipela risos na liklik populesen tru mak bilong en i 7 milien, taim yumi sikelim wantaim ol arapela Pasi-fik kantri. Maski neturel risos i pulap laip bilong planti lain long ples i hat. Na em i no isi long ol pipel i wok bisnis long sapotim ikonomi bikos em i hat-

wok long kisim helpim long ol benk na fainensel institusen.

Esien Developmen Benk(ADB) i tok bikipela wok i stap yet long wok rifom mas kamap long ol praivet sekta long lukim ikonomi bilong Papua Niugini i gro na kantri i ken go het wantaim ol ikonomik developmen.

Wanpela ripot ADB i kamaut long dispela wik, ol i kolim *Building Dynamic Pacific Economy: Strengthening the Private Sector In PNG* i painimaut na skelim planti ol bikipela hevi o samting i pasim rot bilong ol praivet sekta long gro na i rikomendim ol polisi long PNG i ken bi-hainim.

Paul Holden em i bikipela ikonomis wantaim ADB Pasifik Praivet Sekta Developmen Inisitiv i lonsim dispela ripot i tok i gat bikipela sans long ikonomi bilong PNG

bai gro tasol rifom i mas kamap long praivet sekta long ol praivet sekta.

Mista Holden i tok ol praivet sekta i save groim ikonomi na i no gavman.

Wanpela samting em i tok em, ol benk na fainensel institusen i mekim hat long ol bisnis bai kisim dinau long benk. Ol i save askim long 30 pesen ikwiti na dispela em i bikipela mani tumas.

Mista Holden i tok wok bung namel long praivet sekta na gavman em i namba wan. Em i tok PNG i mekim

planti winmani long sampela, yia i go pinis na putim long infrastraksa tasol i mas bi-hainim rekomendesen bilong ADB long stretim polisi long yusim gut ol winmani long olgeta pipel bai kisim sevis.

Sans bilong praivet sekta long helpim PNG long groim ikonomi em i antap tru. Na ol rekomendesen ADB i mekim em i moa gutpela long helpim PNG gavman long wok bilong en long lukim long ikonomik developmen long las 8-pela yia na i ken helpim gavman long yusim ol risos bi-

long eksport long olgeta pipel long kantri bai kisim sevis.

Long helpim PNG long kamap seif na gutpela na isi ples long wok bisnis dispela ripot i mekim rekomendesen olsem; invesen i mas kamap long ol infrastraksa, rifom long ol besik sevis deliveri, rot PNG i ken opim dua long fainens long ol bisnis na rot bilong yusim gut ol neturel risos na kamapim ol polisi long helpim, na risos sekta long helpim PNG long kamap seif, na gutpela na isi ples long wok bisnis.

Post PNG i baim dividen long gavman

POST PNG i baim K300,000 long winmani i go long gavman bihain long 26 yia.

Praim Minista Peter O'Neill i tok pos opis sevis em i namba wan sevis bilong ol pipel long planti yia na gavman bai sapotim dispela bisnis long stap yet.

Mista O'Neill i singaut long ol wokman na meri bilong kampani long wok strong long givim kwaliti sevis long ol ples i stap longwe long kantri.

Mista O'Neill i tok ol pos opis sevis long wol nau i bungim bikipela hevi taim moa pipel i wok long yusim intanet long salim ol infomesen na toktok tasol em i tok long PNG dispela pasin bilong salim

pas na ol pasel sevis em impoten na bai mas stap yet.

Taim Komyunikesen Teknoloji olsem email, teks mesej long mobail na ol arapela i mekim isi long ol pipel na planti pipel i no moa yusim pos opis sevis long salim pas, Post PNG klostu i bruk daun na gavman long 2014 i givim K20 milien long stretim ol sevis na apim i go long bikipela level bilong salim ol bikipela pasel na kago.

Yu ken salim email na teks mesej long mobail na lus tingting long raitim pas tasol em bai hat long yu salim bikipela pasel long email o teks mesej.

Post PNG i sanap yet wantaim sapot bilong

gavman stat long las yia na i go insait long ol bikipela kago na pasel bisnis na lukim namba wan winmani long dispela na baim K300,000 i go long Indepeden Pablik Bisnis Kopresen (IPBC).

Mista O'Neill i tok em i no isi long mekim bisnis na wok long bisnis kampani tasol i gat bikipela salens, na i tok tenkyu long olgeta wok lain long Post PNG long hatwok bilong ol i karim kaikai.

Long wankain taim long dispela wik long Konedobu Post PNG opis long Mosbi, Mista O'Neill i lonsim e-komes projek, 2014 anuel stemp albam na i opim eir bond weahaus bilong putim ol kago.



Praim Minista Peter O'Neill i witnesim Post PNG baim K300,000 winmani go long IPBC.

OTML TSC putim K270m long ol projek

OK TEDI Maining Teks Kredit Skim i yusim K270 milien long ol developmen projek na program long Westen provins.

Taim TSC program i stat long 1997, planti rurul komyuniti long Westen Provins na Telefomin disitrik long Sandaun provins i kisim planti sevis long helt, edukesen, transport na ol arapela infrastraksa.

Nesenel gavman i putim dispela program long 1995 na long wok

bung wantaim gavman na ol komyuniti, OTML i givim planti gutpela sevis long las 18 yia.

OTML ikonomik program dipatmen i go pas long lukautim dispela projek.

Rijonal Projek Kodineta bilong OTML, Felix Bage i tok dipatmen bilong Nesenel Plening na Monitoring i givim tok orait long K128.56 aninit long OTML TSC program bilong 2014 na 2015.

Mista Bage i tok OTML i kisim planti

askim long ol komyuniti na Lokal Level Gavman long wokim skul, rot, tasol em i tok OTML TSC bai givim tok orait long ol dispela askim sapos i gat inap mani na ol projek ol i laikim i stap inait long 5-Yia Developmen Plen bilong Distrik na Provins.

Mista Bage i tok nau ol i gat 11-pela projek na wok konstraksen i kamap pinis long 8-pela projek.

Ol 11-pela projek em; Balimo Haus sik stej 2 hausing projek-K6.55mi-

lien, Flai Riva Jeti apgrading K14.79 milien, Kuinga Taun surij apgrading K18 milien, Kuinga taun wara sistem apgrading K18.6 milien, Kuinga Sabdivisen Developmen Projek K29.8 milien, Oksapmin Haikul projek K25.9 milien, Tabubil Haus sik hausing projek K6.8 milien, Monfot Praimeri Skul Developmen K8.12 milien, Loma Ok Tedi Fut Bris K4.5 milien na Kuinga Haus sik 20 bet akomodesen K2 milien.



Flai Riva jeti apgrading projek.



The new Fokker 70 jet service. Faster, higher, smoother.....

Call Toll Free on 180 3444 or contact your nearest Air Niugini Travel Centre or Travel Agent to learn more about our F70 jet service.



Air Niugini

www.airniugini.com.pg

EXCLUSIVE CARRIER FOR THE 2015 PACIFIC GAMES



www.airniugini.com.pg

EXCLUSIVE CARRIER FOR THE 2015 PACIFIC GAMES

O'Neill givim nem "Mt Hagen" long Fokker 70

AIR NIUGINI i baim nupela Fokker 70 balus na Praim Minista Peter O'Neill i givim nem "Mt Hagen" long dispela balus.

Praim Minista O'Neill, Gavana Paias Wintgi, Pablik Entaprais Minista Ben Micah, Gavana Peter Ipatas na ol sampela lida na ol ek-seketiv bilong Air Niugini i bin bung long Kagamuga ples balus long Mt Hagen long soim amamas na givim nem long dispela nupela balus.

Fokker 70 em i namba wan balus long joinim Air Niugini long givim sevis long pablik. I gat 6-pela Fokker 70 balus i stap.

Mista O'Neill i tok Air Niugini bai kamap strongpela patna long divelpomen long sait bilong transpot long Hailans rijon na PNG.

Em i tok sevis bilong balus em i bikipela divelpomen na i givim sevis long Hailans rijon. Em i tok gavman bai strongim sapotim bilong en long Air Niugini olgeta taim long givim gutpela sevis long pablik long sait bilong sefti na ol arapela sevis.

Mista O'Neill i tok tenkyu long Air Niugini long kirapim Air Link sevis i

go long sampela provins pinis.

Em i tok wok bilong Air Niugini em long givim sevis long ol pipel na em i tok gavman i mas givim sapot long helpim Air Niugini long apim stended bilong sevis na sefti.

Em i tok gavman i givim bikipela praioroti long stretim ol ples balus raun long kantri wantaim sapot bilong ol arapela divelopmen patna.

Long Kagamuga ples balus, bikipela wok i kamap long stretim teminel na ol bai opim long mun Ogas 2015.

Kagamuga ples balus em bai ol i stretim i kamap wanpela intenesenel ples balus. Na wok divelopmen i kamap wantaim mani sapot bilong Esian Divelopmen Benk (ADB) na PNG gavman.

Ol arapela ples balus long kantri tu i lukim bikipela wok stretim i kamap. Praim Minista Peter O'Neill i tok gavman bilong em i putim bikipela mani long mentenens wok bilong ples balus wankain olsem mani em i putim long ol arapela eria bilong divelopmen olsem edukesen, helt na ol arapela.



Praim Minista Peter O'Neill, Westen Hailans Gavana Paias Wingti, Enga Gavana Peter Ipatas, Fainens Minista James Marape i kamap long seremoni long Mt Hagen. Mista O'Neill i givim nem long nupela balus.

BSP fainensel litresi program rolaut

OL 27 wokman na meri bilong InterOil i greduet long las wik Fraide na kisim setifiket long fainensel litresi long Sevings na Baset rolaut program bilong Benk Saut Pasifik (BSP).

BSP i givim 4-pela de trening long tupela grup bilong ol woklain long Pot Mosbi opis na ol i stadi long ol litresi modul bilong baset na sevings.

Edukesen opisa bilong BSP, Vani

Vani i tok gat bikipela nid long ol pipel bilong Papua Niugini bai kisim save long fainensel litresi.

Planti pipel long kantri i no save long fainensel litresi na dispela progam bai helpim ol, i gat bikipela nid long planti man na meri iong sevim mani long taim nogut na impoten em long gutpela bilong bihain taim.

Wokmani bilong InterOil, Peter Boru husat i kisim trening i tok

fainensel litresi program em i bikipela samting tru long olgeta pipel bilong PNG. Na em i tok dispela program i givim em gutpela save long sevim na baset long mani na em i impoten long em wantaim famili bilong em.

Mista Boru i tok yumi sampela i save long katim daun kos bilong kampani na sevim mani bilong kampani tasol yumi yet i no save sevim mani na kisim taim planti taim wantaim ol famili bilong yumi.

Elsie Girisa bilong InterOil i tok em i lainim planti gutpela samting long sevim mani na baset long tupela de bilong trening. Em i tok fainensel litresi program em i moa gutpela long yumi kisim save na baset long mani gut na sevim bilong bihain taim.

BSP i wok klostu wantaim Benk bilong PNG (BPNG) long Maikro Ekspensen Projek (MEP) long givim trening bilong baset na sev-

ings na mobail mani.

BSP i lukluk long givim fainensel litresi trening long 60,000 pipel na 40 pesen bilong o 20,000 em ol meri bai kisim trening.

MEP i stat long Septemba 2014 na BSP i tok benking edukesen tim bilong benk i givim trening long 4,000 manmeri pinis.

Riviu bilongng fainensel litresi program bai kamap long pinis bilong Ogas 2015.



Ol wokman na meri bilong InterOil i soim setifiket bilong ol bihain long ol i kisim tupela de trening long baset na sevings long BSP Benk las wik.

PNG LNG i makim namba wan anivesari bilong prodaksan

MUN Epril 29 i makim namba wan anivesari bilong PNG LNG projek we Exxon Mobil PNG Limited i statim prodaksen bilong LNG.

Dispela projek em namba wan LNG projek bilong PNG na i kamap gut wantaim prodaksen i stat long Epril 29, 2014.

Stat long taim kantri i salim ges go aut long wol maket i kam nau, projek i mekim 6 milien tan bilong LNG na salim 87 sipmen i go aut.

No gat tok klia dispela taim hamas mani kantri i mekim long dispela 87-pela kago i go aut. Tasol infomesen i kam long gavman i tok

K600 milien winmani bilong LNG i go insait long pablik akaun long Dipatmen bilong Treseri long mun Mas 2014.

Menesing Dairekta bilong Exxon Mobil PNG Limited, Andrew Barry i tok taim kantri pinisim LNG projek na i salim namba wan sipmen bilong LNG long Me 2014, olgeta wok i kamap gut na i winim mak.

Mista Barry i tok ol fasiliti bilong projek i wok gut long 12-pela mun i go pinis.

Em i tok projek i gat 2,100 wokfos na 70 pesen em bilong PNG na projek i ken givim gutpela sevis bi-

long enej saplai long wol na projek em i bungim wol klas.

Long wankain taim Praim Minista Peter O'Neill i Otok em i amamas long ol gutpela wok i kamap long PNG LNG projek na dispela wik i makim namba wan yia bilong salim ges go aut long wol maket.

Mista O'Neill i tok PNG LNG projek i bin bungim planti hevi long taim bilong konstraksen na i kam antap tasol gutpela wok namel long developa ExxonMobil PNG wantaim ol join vensa kampani wantaim gavman na papagraun i lukim konstraksen i kamap gut na prodaksen i

kamap long taim na ges go aut long wol maket.

Mista O'Neill i tok long taim bilong konstraksen moa long 10,000 sitisen bilong PNG kisim wok na ol i kisim moa save long ol skil bilong ol.

Em i tok dispela projek em i wanpela gutpela eksampel invesmen na sans bilong ol bisnis inait long kantri.

Praim Minista O'Neill i tok planti ol bikipela projek i wok long kamap long PNG na tu planti senis i wok long kamap long sevis deliveri long kantri.



Ramu NiCo Helpim Long Stretim Haiwe

RAMU NiCo em wanpela mainin kampani insait long Madang Provins tasol I save helpim ol komyuniti na gavaman long planti wok infrastraksa.

Long Mande dispel wik, Bauri bris or planti lain save kolim "pairap bris" abrusim wara Tapo go olsem long Madang – Lae haiwe I bruk bihain long wanpela trak I kisim kontena bilong RD Tuna I go long bris.

Sampela asples lain husait I witnesim I tok driva blo truk I spid tru na taim em I kamap long bris, em I bumpim bris na I bruk namel wantaim kar I pas long em. Ol kar na lain husait I husim rot na bris I kisim taim stret.

Woks Dipatmen bilong Madang Provins I askim Ramu NiCo go na rausim kontena bilong dispel kar na wokim wanpela liklik rot long het bilong wara we ol kar I ken krosim. Tasol, dispel paiplain bilong Ramu NiCo we ron long KBK main I go Basamuk Rifaineri I stap klostu na dispel bai kamapim birua.

Long aste Trinde, Komuniti Afes General Menesa bilong Ramu NiCo, Martin Paining wantaim Woks Supavaisa, Watch Abraham I stretim tok pisin wantaim ol asples lain long Bauri we bris I buruk na ol I wanbel olsem Ramu NiCo I ken wokim narapela rot long daun-bilo bilong wara na ol kar I ken ron.

Wanpela polis man I stap long dispela taim I tokim ol lain olsem ananit long mama lo, ol graun na bus I stap mak long haiwe na go arasait long mak bilong 20 mitas em I stap ananit long graun bilong gavaman na nogat man I bai askim long komposesin.

Ol lida man bilong Bauri hauslain I wanbel na tok rot I mas go het yet tasol liklik helivim I ken kam long Ramu NiCo wantaim 50-pela 14 fut kapa. Martin Paining makim maus bilong Ramu NiCo I tok orait na bai stretim dispela luksave maski nupela rot I stap insait long 20 mita mak.

Madang Provinsal Woks Dept rot na bris supavaisa, Bayom Bunang I tok ol dispela rot na bris em ol I bin wokim long 1985 na tete I mas senisim bihain long planti wok senis I kamap insait long kantri.

Em I tok ol dispela olupela bris I nap long karim mak long 40 igo 45 ton hevi tasol ol bris na rot I bin bagarap na dispela kain hevi bai kamap na gavaman I mas senisim olgeta olupela bris na rot.

Ramu NiCo I save yusim dispela haiwe long kisim ol fiul na narapela guds na sevis long Madang I go

antap long main ples long Kurumbukari na dispela rot em I bikpela sevis tru. Long dispela as tasol em Ramu NiCo I kamap wantaim ol enjinia na masin bilong em long stretim nupela rot we ol kar na manmeri I ken raun.

Ramu NiCo tu I bin helpim long stretim wanpela graun bruk long kawatwar maket, Iguruwe rot na tu Naru bris long Madang – Lae haiwe ino long taim I go pinis. Kampani I spendim bikpela mani mak long dispel ol wok.

Planti manmeri I tok olsem dispel em wok bilong Ramu NiCo tasol ino tru. Kampani I kisim maining laisens long dikim nikel na kobalt na I no wok bilong em long wokim ol dispel kain rot na bris we I stap ananit long luksave bilong gavaman.

Ramu NiCo, olsem ol narapela kampani I save peim tex na ol narapel luksave I go long gavaman bilong PNG na dispela ol kain bris na rot em wok bilong gavaman na ol lida insait long kantri I mas go pas long wokim we ol pipol bilong PNG na ol bikpela kampani husait I invest long PNG I ken yusim.

I gat wanpela bikpela asua we gavaman na ol pipol I save lukluk na ting olsem dispela kain ol wok em bilong ol kampani. Dispela em I no tru na tingting na pasin bilong ol pipol I mas senis.

Dispela bris bruk long Bauri asples I orait bihain long wanpela liklik rot we Ramu NiCo I wokim tasol dispela bai ino nap stretim ol hevi. Gavaman I nid long wokim wanpela pemenent bris klostu taim na dispela kain sevis I mas go areap long ol pipol na bikpela kampani insait long Madang na kantri.

Olgeta pipol insait long PNG, ol kampani na investas I save peim bikpela tex moni. Na tu I gat bikpela risos olsem LNG I stap insait long kantri we bikpela win moni I save kam insait. Ol lida man na gavaman I mas skelim save bilong ol na stretim ol olupela bris na rot long hailans haiwe na ol pipol I mas kisim gutpela sevis.

Dispela bai kirapim tingting bilong ol bikpela investas I kam insait long invest na tu kantri bai divolop. Gavaman I mas noken ting olsem ol bikpela kampani I mas helivim long stretim ol kain infrastraksa. Em I no wok bilong ol sapos em I no stap ananit long ol MOA olsem dispela Bauri bris we Ramu NiCo I stretim nau.



Bruk bris wantaim truk I hangamap yet.



Woks Supavaisa, Watch Abraham i toktok wantaim ol papa graun blong Bauri long painim wanbel tingting.



Ramu NiCo CA General Menesa, Martin Paining I tok-tok long ol asples Bauri.



Ol asples Bauri lain i toktok wantaim Ramu NiCo na Woks lain long kamap wantaim wanpela tingting.



Wanpela wokman bilong Ramu NiCo i lukim bris i bruk.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College





OL NAISPELA KALA BILUM: Bai ol I soim sampela bilum long so long Melbourne. *Poto: ABC*

PNG Bilum So long Australia

I kam long ABC

Bilum i sanap makim gut kalsa na pipel bilong Papua Niugini long ples yet na tu, long ol narapela kantri.

Dispela em i toktok bilong wanpela atis bilong PNG long Australia, Naup Waup husat i redi long wanpela bilum so long dispela mun.

Mista Waup i tok tu olsem bilum em i sanap makim ol mama long wanem, ol i save wokim bilum na em inap helpim ol wok bilong daunim ol hevi bilong ol meri olsem

domestik vailens.

Em i tok bilum i wanpela kain samting en ol pipel bilong PNG i save luksave long wanpela narapela, maski ol i no save wokim bilum.

Naup Waup i bilong Morobe provins na emi maritim meri Australia, na tupela i gat tripela pikinini husat i save gut long kalsa bilong em.

Dispela so bai stat long Jun 9 inap long 10 Julai na em bai kamap long Alcaston Gallery long Melbourne, biktaun bilong Victoria long Australia.

Australia i no ken toktok tumas long kakaruk bisnis long PNG

I kam long ABC

AUSTRALIA i no ken toktok tumas long tingting bilong Papua New Guinea long stopim wok bilong baim kakaruk i kam long Australia.

Presiden bilong PNG Poltri Indastri Asosiesen, Stanley Leahy i mekim dispela toktok bihain long sampela kakaruk fama bilong Australia i tok kakaruk we ol i save salim i go long PNG i gutpela na i no inap kamapim sik long PNG.

PNG gavman i tok as tingting long putim dispela tambu em long lukautim gut baio-sekyuriti bilong kantri.

Tasol ol fama bilong Australia i sutim tok long PNG long kamapim nating ol strongpela lo long lukautim poltri o kakaruk bisnis bilong en yet.

Mak bilong mani we Australia i save kisim long kakaruk em i save salim i kam long PNG i stap long mak AuD\$20 milien dola long wan wan yia.



Kakaruk i no tan.

Kopra bisnis i strong yet long Madang



Peiwa Aimai i karim kopra long 2-pela tan trak bilong em long sapotim kopra bisnis long Madang provins. *Poto: James G. Kila*

James G. Kila i raitim

KOPRA em kes krop bipo we i save sapotim ol liklik manmeri long ol viles na hauslain long Madang. Maski tude olsem prais bilong kopra i no gutpela tumas, ol lain long ples i go het yet long selim kokonas na draim na salim long Madang taun.

Ol lain we i save bringim kopra na go salim em ol lain long Bogia, Raikos na Karkar Ailan.

Tupela kampani i save baim kopra long Madang taun em long COPM na Prestine Kopra Mill.

Long poto, wanpela asples Madang man bilong Ono viles, Peiwa Aimai, i kisim kontrak long karim ol kopra bek i go long Kopra Oil Mil i stap namel long Madang taun.

Bagaros ya i tok em i amamas long strongim kain wok olsem long sapotim lokal bisnis long Madang.

Peiwa i tok ol lain asples Madang man i mas sanap strong na wokim bisnis, na no ken sindaun nating na kaikai buai na smok tumas, na tok baksait tasol i stap.

Madang Kopra Mill i save baim kopra we ol rural fama i save bringim i go long taun long trak.

Ol pipel long ples i ken kisim moa mani winim ol taun lain

WANPELA save lain long PNG i tok ol lain husat i stap long ples na i wok hat long ol kisim na salim ol samting i ken kisim bikpela mani moa winim ol lain i stap long ol siti na taun long kantri.

Paul Barker, Eksektiv Dairekta bilong PNG Institut ov Nesenel Afeas (NFA) i tok infomel sekta o ol pipel bilong ples husat i save salim ol samting ol yet i mekim i save lukim bikpela mani winim ol pipel i save wok long gavman na ol bisnis kampani long PNG.

Ripot i bin bihainim wanpela wok panimaut

we tupela saveman bilong Australia, em Dokta Paul McGavin na Dokta Luke Jones i bin mekim long planti ples insait long PNG.

Dokta McGavin na Dokta Jones i bin lukluk long namba bilong ol wokman meri long gavman, ol bisnis kampani, na ol pipel i save salim ol samting long maket, na hamas mani tru ol dispela pipel i save kisim.

Tupela i bin lukluk tu long ol wari em PNG inap bungim long bihain taim wantaim ol wok manmeri.

NA lonsim kempen long kendidet Orong

Michael Novingu i raitim

NESENEL Alaiens (NA) Pati i save long rot bilong kirapim wok bisnis long kantri bai kirapim gutpela sindaun bilong ol manmeri na ol haus lain bilong ol.

Fainens Minista, Patrick Pruaitch, i mekim dispela toktok long Sinivit Lokol Level Gavman (LLG) long Pomio Distrik, Is Nu Briten, long taim em i lonsim kempen bilong NA kendidet, Levi Orong, long las wik Tunde.

Mista Pruaitch i tok Nesenel Alaiens Pati bai wok bung wantaim O'Neill Dion gavman na member bilong Pomio long

kisim sevis i go long ol manmeri bilong Pomio distrik.

Em i tok Pomio i nidim wanpela gutpela lidaman long kisim wok developmen i go long helpim sindaun bilong ol manmeri.

Em i tok ikonomi o wok bisnis bilong kantri i ran gut na long dispela as, NA i laikim gutpela lida man long wok wantaim ol long kirapim wok go het long Pomio distrik na kantri wantaim.

Mista Pruaitch i tok Nesenel Alains Pati i bin stap long gavman na i givim helpim mani mak olsem K1milien i go long Gesel Restoresen Egensis long helpim ol pipel bilong Rabaul taim ol i

kisim taim no gut long mauten paia long 1994.

Moa yet, em i tok Pomio distrik i stap long busples we no gat gavman sevis i go insait long en na sapos kendidet bilong NA, Levi Orong i winim Pomio Open sia long bai ileksen, ol bai wok bung wantaim long kirapim Pomio i go het.

Mista Pruaitch i singaut long manmeri bilong Sinivit LLG long votim Levi Orong long kirapim gutpela sindaun bilong ol.

Em i tok Mista Orong em i strongpla lida man na i save wok hat na bai em i kisim sevis i go long manmeri bilong Pomio.

Baramandi kepten strong long T20 WC Kwalifaia

JACK Vare-Kevere nupela kepten bilong PNG Barramundis Kriket Tim i gat strongpela bilip olsem tim bilong em i redi tru long mekim sampela bikipela seksek long Julai insait long T20 Wol Kap Kwalifaia long kantri Ireland.

Vare- Kevere husat i gat 29 krismas i kam long Westen Provins na Milen Bei na Hanuabada i tok tim i redi wantaim ol kain stail trening bilong mekim ol i kamap fit long go insait long T20 Kwalifaia Tonamen. Dispela bai namba tri taim nau long ol i go insait long T20.

2015 ICC Wol T20 Kwalifaia bai kamap long 9 Julai i go long 2 Ogas 2015. Tonamen bai kamap long Ireland na Scotland wantaim.

Em i kamapim wanpela hap bilong ICC Wol Twenti (20) Kwalifaia. Bai i gat 51 pilai resis i kamap namel long 14 kantri, na em i mak i go daun liklik



Nupela PNG Baramandi Kepten, Jack Vare-Kevere.

long pastaim mak bilong 72 pilai resis namel long 16 kantri.

Sikspela namba wan long winim tonamen bai go insait long pilai long 2016 ICC Wol T20 long India.

Vanuatu bai kam long Pasifik Gems long Pot Mosbi

MASKI Vanuatu i kisim hevi long bikipela saiklon na i wok long stretim sindaun yet, kantri bai salim ol etlit i go long Pasifik Gems long Pot Mosbi, PNG.

Sef De Misin o tim lida bilong Tim Vanuatu long Pasifik Gems, Eileen Nganga, i Vanuatu bai

go het i yet na salim ol spot manmeri bilong en i go long bikipela rijonal pilai bai kamap long PNG long mun Julai.

Eileen Nganga i wok tu olsem Honoreri Konsal bilong PNG long Vanuatu.

Em i tok ol i wok long redim ol etlit bilong ol,

maski saiklon Pam i bin hamarim kantri long mun i go pinis na kamapim sampela hevi long trening bilong ol.

Vanuatu bai salim moa long 200 spot manmeri na ol opisal i kam long Mosbi long stap long dispela bikipela bung bilong Pasifik rijon.



MASKI Vanuatu i kisim hevi long bikipela saiklon, kantri bai salim ol etlit i go long Pasifik Gems long Pot Mosbi, PNG.Poto i soim bikipela bagarap long Vanuatu long tupela mun i go pinis. *Intanet poto.*

Laip Tura Kokomo raun long rilei baton long Nu Ailan

DISPELA wik, Oil Search Pasifik Gems Rilei i kamap long Wes Nu Briten Provins insait long Niugini Ailans rijon.

Wes Nu Briten em i namba 10 provins long kantri we dispela 2015 Pasifik Gems Baton Rilei i go long em bihain long em i raun long las tupela wik long Manus em i namba 7 provins we baton i ran long en, namba 8 provins em Nu Ailan, na namba 9 provins em Hela.

Baton Rilei i bin wok-about moa long tausen kilomita na lusim Moro insait long Hela Provins long dispela wik Mande long flai i go long Hoskins na Kimbe long Wes Nu Briten na go kamap long hap long nait.

Ples i bin gat bikipela ren, tasol em i go daun liklik long Gavana Muthavel na ol arapela bikman i welkamim baton na tim long provins.

Lusim ples balus, ol i bin kisim baton long kar long ol strit long Hoskins na stop long Hoskins Sekenderi skul we ol sumatin i lukim, holim na pilim.

Long nait, rilei tim i bin go long wanpela bung kaikai we Gavana Muthavel i bin putim kamap long Walindi Risot long welkamim ol long welpam provins.

Long Tunde, baton rilei i bin raun na wokim ran insait long Kimbe taun.

Long wik pastaim, baton i bin raun long Hela Provins, Nu Ailan na Manus we ol skul sumatin, ol woklain, jenerel pablik long taun na ol viles i givim gutpela welkam long en na rilei tim.

Oil Search i bin kisim baton na tim long wanpela sata ran bilong balus antap long ol maunten ples na ol kaukau gaden i go long Tari long Hela provins.

Embaseda bilong Oil Search, Willy Kupo i bin givim baton i go long Minista James Marape we ol bikman bilong ples na ol Huli wigman wantaim ol naispela bilas bilong ol i bin wet i stap long ples balus long welkamim tim na kisim baton.

Mista Marape i bin toktok long pipel na amamas long ran wantaim rilei tim, na tu, em i



AIYOO NAISPELA PIKSA ...LAIP KOKOMO: Tru tru laip Tura the Kokomo o? Nais long lukim laip kokomo i sindaun antap long Baton taim em i bin raun na Rilei tim i ran long Kavieng Taun, Nu Ailan provins. **Poto: MadNESS Photography**



110 KRISMAS TASOL I STRONG YET: Lapun mama na bubu, Saping i gat 110 krismas i bin gat sans long holim Baton taim em i kamap long Kavieng taun. **Poto: MadNESS Photography**

bikipela na gutpela samting long rilei tim i raun long olgeta hap bilong kantri long ol pipel i ken lukim na pilim spirit bilong 2015 Pasifik Gems.

Long stap bilong Oil Search Rilei Baton long Nu Ailan provins las wik, ol pipel na skul sumatin i bin givim

bikipela welkam taim em i raun long Kavieng taun, ol skul, Buluminksi Haiwe na ol nambis ples.

Shane Clark bilong Rubio Plantasin Ritrit i bin kisim Baton i go long sef long promotim Sefing Asosiesen bilong Nu Ailan provins.

Taim Rilei tim i wokim

rilei ran long taun, Bisop Alphonse Kipapseni bilong Kavieng Katolik Daiosis, ol wod kaunsila, ol tisa, ol bisnis lain na ol nes, ol woklain bilong BSP, Telikom PNG, wanpela lapun meri i gat 110 krismas na wanpela laip kokomo pisin...

Stop N Shop Vipers fowad Samuel Koim wantaim bal i ranwe long pilai bilong Galf Isapea long Digicel Kap resis long Mosbi. Isapea i win.

OI wiken eksen poto...

Karate Eksen long PNGIPA long wiken. Dispela pait em bilong ol junia.

Nesenel Supa Lig soka long Pot Mosbi namel long Pom FC na Oro FC. Pom FC i winim pilai bilong ol.

OI poto: Nicky Bernard

Gol Kipa bilong Oro i sevim wan-pela gol long mak bilong em.

PNG Golf Open Sempion Josh Cabban i putim grin saket bilong em olsem em sempion. Long sait em makim gut bal bilong em bipo long em paitim go insait long hol.

IMPROVED TASTE!

Niupela teist wantaim planti mit na oil. Teistim na bai yu laikim moa yet.

DIANA

Tuna

Emi tuna bilong PNG

PROUDLY PNG MADE

Manufactured by: RD Tuna Canners Ltd.

Moa mit na oil insait



DIANA Blu

TUNA IN OIL

Hunters i redi long dispela wiken

SP PNG Hunters kosa Michael Marum i amamas long tim bilong em i kam bek long las wik Sarere PNG Kumuls i pilai wantaim Fiji Batis. Em i tok ol i no kisim wanpela bagarap na ol i redi tasol long dispela wiken Raun 9 pilai resis wantaim Northern Pride.

Kepten Israel Eliab, Thompson Teteh, Noel Zeming, Kato Ottio, William Minoga, Brandy Peter, Adam Korave na Wartovo Puara nau i go insait long pilai long Sande tim long Kalabond Oval.

Lawrence Tu'u husat i no stap long dispela resis long Gold Coast tu i go insait wantaim dispela 29 man skwat.

Tim bilong Pride, husat i primia tim nau i kalap i go antap long 8-pela poin moa, tupela poin tasol aninit long ol Hunters, bihain

long win bilong ol wantaim Sunshine Coast Falcons long dispela wanpela gem tasol ol i bin pilai long wiken olsem gem bilong 'ketsap' resis.

Pastaim ol i bin kenselim dispela gem bikos long Saiklon long Not Queensland. Ol nara-

pela pilai resis long las wiken em ol i bin lusim bikos 9-pela bilong ol SP Hunters tim memba i stap long Kumul Tes wantaim Fiji Bati na ol narapela bilong Intras Supa Kap em ol i go insait long pilai long NSW Kap sait.

Stail mangi bilong solwara

Shane Clark bilong Rubio Plantesen i bin kisim Baton i go long sef long promotim Sefing Asosiesen bilong Nu Ailan provins. *Poto: Mad-NESS Photography*

Lukim ol wiken spots poto eksen long P27...





FUSO

Mitsubishi FUSO Rosa Bus

Apgrd ensin
130Hp
4 silinda disel

NAMBAWAN KWALITI NA SEVIN MANI LONG FIUL



PIKSA EM BILONG ILLUSTRASEN WOK TASOL

Ikamap Wantaim 26 na 30 Sit

Hariap nau na go long Boroko Motors dila bilong yu

BOROKO MOTORS

Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg

MP1412294a